

萬 有 文 庫

第 二 集 七 百 種

王 雲 五 主 編

洪 北 江 詩 文 集

(七)

洪 亮 吉 撰

商 務 印 書 館 發 行





洪北江詩文集

(七)

洪亮吉撰

國學基本叢書

卷施閣詩卷第十七

回舟百嶠集乙卯丙辰

自鎮遠舟行至常德雜詩

時正會勛銅仁沅州紅苗一路皆傳箭遂舟僅乃得過亦幸水程距札營處稍遠也

青溪及玉屏水程從此起飛夢入吳江迢迢七千里

兩關皆虎豹一棹若蜻蛉昨得軍門札傳烽送使星

孤猿攀危崖意思亦若懾仙人飛空行投杖手復接

一程復一程幸爾水流急山頭看花苗排刀向空立

水祇深三尺舟搖亦不妨來朝衫笠影隨月漾瀟湘

見慣卽不驚殘骸蔽江黑鷹隼何不仁抽腸作常食

楊柳千條巷夫容百尺樓可憐兵火後剩有夜烏愁

浦市甫經燒劫所見尤慘

空灘三百級一石一文贏更有莓苔影朱文漾錦波

殺聲喧落日何處可潛逃幸是昏黃月騰身附鵲巢

泊舟仙人房仙人遁無影我欲上帆竿延回瞰深井

楚女生來好。凌晨掉小舟。神魚知好色。出水看梳頭。
及到洪江口。材官馬上迎。蘆灘都有謀。不敢點燈行。
人頭及人脛。一半出魚腹。怪底帆不前。荒灘鬼叢哭。
凌晨坐清寒。閉目養心性。過盡千百灘。都從雙耳聽。
烽煙不到處。幾樹發黃梅。鵲語先傳喜。雲光亦四開。
六州兼十縣。魚鳥竄紛紛。只惜桃源洞。難容爾許人。

辰州謁畢尙書師出所定詩文集見示卽席賦呈二首

一半戈船下瀨橫。烽煙開處見山城。天南縱置籌邊驛。研北仍聞擊鉢聲。幕府盡稱詩弟子。謂劉侍御錫嘏等。虛

窻閒禮古先生。軍容茶火由來盛。未改臣門似水清。
述作多應拜下風。憐才如此復誰同。諸生並致三霄上。五嶽分標各卷中。歲月釀成無事福。灾氛消盡未
言功。殿頭第一人爭羨。不負科名僅有公。

常德胡同年文銓招飲郡齋卽席賦贈

十年前事重徘徊。曾醉梁王百尺臺。未覺壯懷輸少日。不妨閒裏鬥深杯。掃除硯北橫經席。料理城東小
史來。清興到今仍未減。春風先爲拆疎梅。

荊州喜晤錢上舍伯垌卽送南歸并寄令叔維喬

年時揖子清暉橋。卷施閣中挂酒瓢。沉沉醉後不能別。轉盼燭花明復滅。彈絲戛竹夜未央。節日笑我行

何忙。一城春燈轉曲廊。送者短趙兼髯莊。謂舍人懷玉縣丞實書翩然一別萬餘里。凌亂雲山馬頭起。尙書筵上說

錢郎。抵辰州日尙書爲言君尙在荆臺未歸坐客半驚余失喜。嘉平廿日來渚宮。騎馬直詣官衙中。攔門握手久相視。尙喜

君貌非衰翁。中郎阿大欣俱在。時令兄錢亦在署詠絮詩成復誰對。我官蠻府已四年。才劣恐難成一隊。飄風三

更入五更。墻外羽檄飛無停。龍山殘雪落如掌。頗念未息征苗兵。萬言揮灑仍如故。此筆合移書露布。不

然手挽五石弓。上馬殺賊成奇功。稜稜俠氣填胸抱。可惜君偏著書老。卅年知己姜侍郎。姜巡撫一見猶記

一傾倒。雖然此遊不可忘。踏徧七澤兼三湘。零珠斷璧篋中字。尙抵陸賈千金裝。欲行不行更搔首。握別

還思素心友。君不見。竹初菴內證無生。應笑勞人日奔走。

荊州官廨借錢上舍鉞令弟伯垌暨崔恭人作消寒七集卽席有懷崔丈龍見

款客荆臺苦致思。舊遊重到酒難辭。猶憐匹馬衝寒日。卻值閑庭詠絮時。久別未妨書代面。故交多已鬢

添絲。冰弦彈至傷心處。時話文敏舊事不管花窗夜漏遲。

一載軍書插羽飛。人傳公瘦我寧肥。路穿烽火驚身在。夢逐波濤入姊歸。時在宜昌一帶讞獄會面未能忘息壤。關

心先自理初衣。君時乞養病歸里未允天南佇看苗氛淨。好買蓉湖築釣磯。

題崔恭人秋山訪菊圖

幽窗雨過點青苔。蠟屐曾從響屨回。自覺向來秋氣少。不隨探菊祇探梅。丙午二月曾追陪鄧尉看梅。

衫裳葉葉起雲霞。簇蝶裙飄一徑斜。卻過小橋天路近。絕無人跡有飛鴉。

飛瀑渾疑石上琴。欲從何處更幽尋。空明一點靈山月。與證迢迢世外心。

雲裏紅闌曲折橫。半秋時節出山城。飛仙一個花千朵。都署頭銜太瘦生。

閒從卷裏憶西州。零落羊曇感舊遊。苦向尊前問癡叔。謂大令維喬。渚宮殘雪不勝愁。

少日談詩有性靈。後堂延客眼先青。願營百本梅花屋。更展紗帷乞授經。

酬錢上舍丙曜

舊時門巷判西東。蠟屐常穿楊柳風。占得雲溪一灣淥。小樓都在水聲中。

詞筆欣看萃一門。比年風月共琴尊。龍華會上如相問。交到彭侪四葉孫。余幼時謁藩山公。即蒙獎識。及長。受尙書之知。又與大令及伯

坳兄弟並稱莫逆。

鄉園春半飲屠蘇。握別仍行萬里途。自笑遊蹤太遼闊。更從北夢說西湖。前在西湖與君別。

襄陽呈房師王觀察

遠宦迢迢各一方。馬頭真喜向襄陽。西南尙見烽煙赤。師弟初驚鬢髮蒼。懷古池臺聊駐節。探春簾幕偶

傳觴。是日立春。盈箱案牘須勤理。肯學山公醉百場。

立春日過襄陽謁羊杜二公祠有懷孫觀察星衍山東

君爲東國諸侯長。我作南方多士師。竹馬共思逃塾歲。土牛又見迓春時。酬恩尙愧身無補。傳世先驚髮有絲。至竟古人能及否。薄醺閒謁二公祠。

元日南陽

幄殿趨朝夜向晨。宛南春首淨無塵。早聞內禪光唐宋。又見元年值丙辰。全楚正欣秋再稔。史官應奏日重輪。堯階未在三陪列。尙愧西清侍從臣。

人日抵鄭州巡撫景安遠遣人相迓書此報謝

握別梁園已八年。憶君風味逼前賢。大河南北頻經歎。好爲蒼生計息肩。

人日聊登百尺樓。繁臺東望久淹留。破除舊例吾何敢。瘦馬羸童入鄭州。君清素如昔。一切酬應送迎之禮皆絕。今獨遣一介相及。是以

云。

衙齋聯句記經時。風雪甘涼苦致思。在甘肅籌邊最久。尙以書生待開府。逢人仍索憶山詩。君所著有憶山詩草。

王大令復專人約遊偃師余以驛路迂回未果翊日從岡里渡河半渡風發舟幾覆日晚僅得抵南岸因

徒步攜從子兩門生至惠濟橋行館宿卻寄大令一首

故人一別經歲時。封書約我遊偃師。把書沉吟復東走。塵土隨人已三斗。津頭塵暗風尙微。挂席如馬從風飛。忽驚風從半空旋。長年大呼人語亂。眼看北岸離纜尺。帆急欲收收不得。一風吹舟舟轉輕。樓榜盡訝凌空行。蕭然天末一使星。河伯已遣蛟人迎。盤渦欲下仍未下。惡浪幸從船後瀉。舟人心定客始猜。欲抵岸北偏南來。聳身一躍得平地。觀者居然詫神異。鄰舟望我竟若仙。餘艇尙在風中顛。君不見。故人此日遲高會。客臥津亭自顛沛。瓦燈一盞土橋南。且喚行童理生菜。時覓食物無有。僅得生菜數把。

葉縣道中雜詩

保安及昆陽。一驛三十里。奔馬逐歸鴉。齊入黃塵裏。屠蘇酒乍傾。簫鼓賽昇平。爆竹聲何脆。年頭年尾晴。卓午昆陽道。溪橋細細風。春衫紅一片。併颺日華中。

寄王大令復

南來已是一句馳。真擬恹恹入偃師。河外土風堪作宰。洛中人日偶題詩。何因祖客筵前酒。轉憶孫郎帳下兒。來書言及舊僕吳順。已作孫郎帳下兒矣。幾許笙歌兩行燭。呢人魂夢憶多時。

黃河阻風卻至惠濟橋行館晚攜從子門生至橋東玩月作

寂寥山館許停驂。酒薄都憐興未酣。多謝北風能款客。吹帆三日住河南。

頽墻三折路參差。拂樹先驚鵲踏枝。豔殺野橋山店月。不妨人去立多時。
過新鄉贈孫同年希元

籃輿薄晚過山莊。飛騎驚看迓道旁。一代相門傳縣譜。君爲文定公從孫。千年古邑號新鄉。采風近郭民謠肅。話舊虛窻月影涼。更喜外臺條教密。時景侍郎撫豫有善政。又爲州縣設立科條甚周。

兩河應可息痍傷

曉發湯陰

破曉趨南郭。城荒竹木稠。地爲今下邑。山卽古中牟。殘雪明華表。驚沙暗驛樓。停驂吾不願。昨已飯宜溝。
將至安陽先柬趙大令希璜二首

尋常三五團欒月。自到牂柯見未曾。料得鄴中元夜好。故人應爲剪春燈。

爾許情懷漸不支。屏除絲竹已多時。還能與門筵前酒。可有孫郎帳下兒。壬子冬。飲君署。醉甚。幾欲逃席。值孫兵備。舊僕郭勺。藥代飲數

觥乃解。

湯陰謁岳忠武祠

古木叢臺起怒風。岳王祠倚堞樓東。何因浣盡孤臣血。不祀前朝穉侍中。
埋骨西湖恨已多。小朝廷久厭兵戈。此方立廟非無意。尙爲君王障兩河。

抵安陽境塵土撲人戲柬大令一首

主人倘厭客經過。故遣飛沙織似梭。休望琴堂門尊酒。元規塵已污人多。

十四日未刻抵安陽趙大令爲招春燈社火讌客海棠詩屋至三鼓乃別翊日更邀遊天寧禪寺設百戲
餞別醉中賦贈

鄴中十萬戶。一戶排雙燈。城東城西徑十里。萬影礙月難東升。安陽大令我素知。飛書約我停少時。排門
燈影看不足。中有戛竹兼吹絲。紅塵障天綠波掣。馬尾搖風馬頭月。鼓樓街北蕭寺東。齊捲珠簾看飛雪。
昨日醉幾場。好友爲我招張王。皆幕中賓客海棠詩屋圍社火。夜半更約傾千觴。今晨別何地。更遣聾丞控飛
騎。佛樓開處面廣場。關戶爲余陳百戲。此回元夕無不有。月影燈光與杯酒。董生董生惜前走。謂上舍達章時已入
都說與王郎應妒否。謂大令復更排石級上石亭。一城華燈尙若星。摩挲金石百回步。寺有元至元十二年足鐘銘及至正中石刻
力倦處開僧扇。念君官事忙如許。衆裏離觴復頻舉。一晌歌聲壓彩雲。梅花山館飛如雨。君持手板輿前
立。我瓣心香馬頭揖。時以所刊近著見贈別袂猶餘燭燼光。離亭已暗風沙色。

晚發安陽至磁州行館一路燈火甚盛喜而有作

十里平沙柳數層。漳河橋上月初升。何因爛醉安陽酒。來看磁州郭外燈。

李舍人鼎元登岱圖

平生心力瘁躋攀。五岳遊完鬢未斑。肯待向禽婚嫁畢。僅留老眼看青山。
欲捫星斗挹穹蒼。杖策仍須辟穀方。我是上春君早伏。入山先已異炎涼。

戲題秦人種桃采芝圖

童男童女五百桃。實桃花萬千。何不成鄉里。婚男嫁女耕田。
毛女忽然大笑。惹他四皓顏開。商洛山連太華。大家飛去飛來。

馮給諫培竹鶴圖

意中我有閒樓閣。閣下亭亭立雙雀。雀徑時看一花落。胸中我有奇峯巒。此外觸處皆琅玕。六月更有松風寒。乘軒豪此君直。開徑居然得三益。門開無人雀亦應。門叢竹兩兩爲除行塵。門關無人竹亦索笑。仙禽翩翩自詡同調。先生此圖實得我心。雀既有侶修篁成陰。尙恨竹外無月。雀邊無雲。石牀無積書。竹兒無清尊。客來不醉相對。何以能追古人。君不見今人不來古人往。雀步空庭竹森爽。畫中山好不可居。何不歸爲五湖長。

寒食早得家書偶題二絕寄南中小兒女

莫怪尋常鶯燕猜。踏青時節未花開。鉤簾欲訪春消息。却值江南驛使來。
平堤一色綠初鋪。四月江鄉畫不如。遙憶風前小兒女。紫藤花下讀家書。

奉酬邵學士晉涵病中見寄之作

與君卜鄰意非好。欲拉酒徒時醉倒。墻西望汝一樹花。君病未瘳春遽老。牋云日噉半甌粥。頗厭墻東酒徒擾。墻東酒徒非得已。匝月行完七千里。轟天礮火衝身出。弔影驚魂可知矣。昨來偶自窺青鏡。不覺二毛填鬢底。期君醉我君辭疾。反作新詩惱行客。酒逋我縱盈門索。藥券知君亦山積。君如戒藥我戒酒。一日顛毛恐俱白。

李公子存厚梅窩圖羅兩峯畫

橫斜影百枝。坡陀石千尺。不知是我不得來。或是君家不招客。花遮簾櫳柳藏橋。空裏似飛鶴一隻。有魚千頭禽百翼。幽人一一與之數。晨夕兩峯畫石如屈鐵。兩峯畫梅如值戟。披圖我忽念疇昔。三十載前攜蠟屐。余未弱冠時從叔爲崑山尉曾過訪留居旬日一峯如頽一峯劈。更上一峯吹竹笛。此時不知梅窩在南復在北。但見高低

屋橫脊。屋上殘冬雪花積。百年君居此山側。孫時看梅祖所植。幸我淵源盡相識。不然何以揮灑千言有餘力。詩成對卷仍嘆息。兩峯老嬾殊可惜。君不見。玉峯前頭湖水碧。咫尺應須望鄉國。倘使餘牋更有一丈長。直接吾家水西宅。

卻扇詩爲吳孝廉薰賦

譽婦詩成百口傳。可知標格本天然。青綾步帳曾相識。我是張子友謝子。吳所娶爲孫兵備從妹

半臂新裁蜀錦鮮。薄寒聊與壓吟肩。馬頭明月如團扇。偏照恹恹惜別筵。
耳語臨岐記可眞。回頭生怕阿兄憎。看花遲早尋常事。莫作蓬瀛第二人。
怔忡鞭馬出金臺。失意偏教笑口開。我憶堦鄉風日好。紅荷百頃待郎回。
白髮詩爲胡上舍唐作

鄰東胡生昨叫絕。白髮忽然衝帽出。大呼擲帽理髮末。幸喜根株惟有一。胡生胡生意若失。走馬索詩兼
口述。我爲生語生勿怵。此事何關存與歿。古來賢聖半天折。顏賈頭中無此物。矧生飾貌有不屑。從此何
妨罷梳櫛。平生品與陸展別。無子未聞收側室。鉗之鑷之可不必。生聞我語笑兀兀。二三子者粗有筆。爲
我責頭須痛切。我聞生言意亦豁。一毛雖小慎勿拔。或者明朝生七八。疾呼奚僮馳急札。朋來盍簪賀白
髮。茅柴之筵咄嗟設。生今上坐非忝竊。燕毛之禮誰敢忽。雖然生不可不察。此物上頭急作達。從茲陸行
乘驢水乘筏。面垢莫除塵莫刮。衛玠弗愁人看殺。

題王太守宸仿董北苑瀟湘圖爲徐孝廉嵩賦

此卷長三尺。零陵老守圖。居然棐几側。隄落洞庭湖。山水情今古。荒唐夢有無。臥遊吾尙記。千里下黔巫。
予自黔中還朝取道洞庭

四月廿日與胡公子稷會飲金光祿孝繼宅被酒醉甚歸途于馬上得五百字卽送南歸兼柬莊上舍達

吉陸秀才繼輅

今年絕代才。皆下考功第。汪端王孫。徐嵩趙懷張安。尤苦不得意。王生除學博。賣字作歸計。趙生居僻巷。

忽爾鬧車騎。無端長鬚奴。失笑復垂涕。揭曉前一日。汪生將外擢。以助教當。畢力此一試。寅初聞揭曉。側

立門隙伺。猛聞敲扉聲。妻子雜沓至。寧知非報捷。有客誤投刺。徐生病支離。一夜屢登廁。先期唵病鶴。甫

作病鶴賦。識已兆雷翅。蒙頭聞報罷。急起理囊笥。張生已獲售。黜落爲奇字。欲歸東西川。柰此楚氛熾。相邀避

人跡。戚戚聚蕭寺。吳生顯示不屑。頻日酒筵肆。監廚得驚坐。謂假陳肯。肴饌悉精緻。酒徒七八輩。痛飲日

三四。我慚居下位。不克挽風氣。尙書名知人。紀宗本可愜羣議。微嫌心有主。意在急防弊。遂令中材升。杞

梓或被棄。凡茲數君子。一一洵國器。中年饒底蘊。詎止文藻麗。沉淪致顛蹶。此事亦匪細。今晨聞剝啄。君

又理歸轡。君才希數子。靡不夙投契。況茲年尙少。拭目盼遭際。嗟貧兼歎老。與衆不一例。感君行計速。飲

餞爲粗備。不愁分袂早。反恨遲把臂。君歸過庭暇。勤學戶嘗閉。吾州衙署廠。古檜陰拂地。側聞賢太守。一

歲興百廢。靈瓏疏曲河。構閣臨睥睨。春闈兩人捷。吾鄉獲。已獲毀橋利。形家言吾鄉威暨堰及城中白雲

之其餘懲薄俗。悉力整凋敝。侯賢實棄梓。予與太守東望舉足企。明春當乞假。官閣尙可詣。蒙莊雖從甥。

夙昔視猶弟。知君過從數。一語煩遠寄。逋錢三百萬。土木苦煩費。園成諸債集。何不築臺避。陸生才筆健。

竟欲逾老驥。陸生嘗昨來觀近作。好句我能計。吾鄉茲數子。得不詫尤異。相思不相見。發念時一寘。遊山

我防嬾日在空中肆。所欣腰腳健。百里走向易。一羸聊負篋。一僕持絮被。預思重握手。不得到春季。倘及三月三。春江可修禊。

五月初八日。方比部體吳孝廉。與邀同人出西直門。小集金氏園亭。卽席賦贈。並送桂大令。馥之官雲南。雨絲踈不斷。一路出西城。日閃塲頭影。雷轟澗底聲。草高飛騎入。花滿露舟橫。清絕尙書塢。當門杞已生。幾許關心客。無多賣賦錢。暫拋官裏事。來趁酒家眠。岸柳陰三面。溪雲白四邊。遙程愁更數。西去萬二千。

城南雅集圖

城南雅集圖凡八人。法祭酒式善、李編修如筠、張檢討問陶、劉舍人錫五、何戶部元煊、水部道生兄弟、王廣文、芭孫、徐孝廉嵩、圖成、屬亮吉跋之云爾。

城南百萬家。屈指無幾人。匪繫果無人。下直常閉門。幾年我苦居。天末閒煞城南好風月。側聞我友興尙豪。把卷呼之齊欲出。法祭酒王廣文。近來作詩種雅馴。徐孝廉張檢討。倔強自誇長句好。介休詩老偏改官。貧甚不厭居長安。稜稜弱冠才尤異。難得何家好兄弟。我交短李惜已遲。覲面却值居憂時。八人所貴忘形久。不問圖中貌妍醜。昨日作一篇。今日作一篇。城南塵舍不數里。時有飛騎馳吟箋。流傳俗口殊難耐。只說羣兒自相貴。豈知帝京景物本冠十七州。賴有數子晨夕成清遊。不然東西紅塵日如織。何以使春花生輝月饒色。一奴前行不著鞭。八騎矯首皆如仙。穿行古刹及荒墅。日永或借閒齋眠。數君才調皆

經世所喜昇平無一事。木天粉署官本閑。欲以琴尊消壯志。徐生忽然策蹇驢。

時下第南歸

王子亦欲登牛車。

時赴華亭教諭任

遂令七客忙不已。分日載酒延王徐。還君斯圖三太息。勝會如今亦難得。卷圖水竹自生涼。差

信此中無熱客。

法祭酒雪窻課讀圖

堂中一寸書。門外三尺雪。弧兒讀未完。慈母心若結。朝行課讀書。暮行課讀書。弧兒業甫成。慈母年先徂。

衰親無百齡。積雪不逾月。所以人子心。常思事親日。感君與我孤露同。六歲七歲稱孤童。

君以七歲孤余甫六歲

貧

家無師讀不得。卒業皆在紗帷中。雖然我與君稍異。憂患餘生復難記。五雅三蒼業縱同。經句九食談何

易。白雲前頭一曲谿。

余昨繪機聲燈影卷子亦圖太安人課讀時事

昔者我友曾分題。長檠無光短檠繼。持較此卷殊依稀。我家

茅三層。君家竹千箇。我家屋比君家破。雪朵盡從頭上墮。君家門向左。我家門向右。我家雪比君家厚。徹

夜有光飛甕牖。可憐遲暮猶耽讀。只惜春暉杳難續。每值窮冬風雪辰。攤書時向茅檐哭。吁嗟乎。今年之

雪非去年。今日之景非從前。安得衰親常存雪不化。兒寧讀書終老茅檐下。

少宗伯鐵保暨少宰玉保繪聯床聽雨圖屬題率賦一篇

散人步入蓬萊遲。大茅小茅皆本師。天門不敢與鈞禮。却憶抗手同行時。

余與少宰同舉京兆鄉試

祇疑未換仙人骨。

閑掃落花消白日。忽聞天上落吟聲。矯首不禁狂興發。披圖乃仿逍遙堂。下直兩兩登匡牀。置身高處莫

忘却。但見楊畔左右竹柏搖青蒼。誰言天上清閑極。一例苦吟能入癖。他時竹杖或敲門。慎莫移牀先遠客。

送桂大令馥之官永平

汪錢盧邵

汪明經中錢教授塘暨盧文昭邵晉涵兩學士

相繼作海內故人今益稀。洪生終日塊然坐。欲哭不哭常歔歔。數君豈

止傷天折

汪錢邵年皆僅五十左右

六藝微言亦將絕。閒披篋底出手箋。精義猶堪補殘缺。桂生亦是今儒者。六十肩

門校蒼雅。遠官萬里無一錢。手抱遺經尙難捨。君不見許君弟子有尹珍。首以小學傳蠻人。二千年來師

授絕。得毋待爾一一重敷陳。君不見蠻方志乘尤疎略。若水蘭滄考須確。博南尙許宦三年。他日應傳睦

君學。

題陳布衣嵩畫梅册子

君前築屋臨江屯。老梅一株香一村。泠泠江水半彎綠。更向花下開橫門。幾年作客思家切。手寫一枝如

鐵屈。猶嫌比屋多塵氛。不遣虬枝四邊出一花。中間綴一星。空處掩映天光青。嚴寒百鳥絕無影。間有老

鶴來梳翎。客來時立梅花側。是客是花渾不識。三更月淡雨又來。清冷獨抱花魂回。

題陳同年慶槐借樹山房

人生天地間。百物無不借。日受天地恩。不向天地謝。况乎百年內。偶復賃傳舍。何人開此巷。此屋又誰架。

主人名誰何。何日得閒暇。因而覓奇樹。一一種如椽。何年高出屋。清影相激射。自從有樹來。人事疊交卸。前者有因依。後者得憑藉。冬有以爲冬。夏有以爲夏。時而陰清晝。時而響長夜。賒此千尺陰。無須一金價。居人不之德。鄰亦不之訝。我今爲評量。不得不枉駕。知非乞諸鄰。造物者所貴。君如思報德。日日羅酒炙。邀此一世。人相與酣樹下。狂來鋪席臥。林密已無罅。倘問身所來。亦從天地假。

七月七夕吳侍講錫麒招集澄懷園賞荷卽席賦贈

居然秋雨餘。邀客集深徑。何止盈眸花。葉聲清可聽。槐黃堆北牖。香氣一窻迸。奇書隨手讀。兼復展明鏡。婉婉越客謠。沉沉洛生詠。雖無鸞鳳翮。雅有麋鹿性。蒙莊方任達。管輅苦言命。坐中趙味辛舍人談命不已。莫負佳節。歡移樽酌波。暝。

酒半移酌池上與張同年問陶皆失足墮水戲作一篇並呈

西頭萬葉戰秋雨。東岸百花明夕陽。夕陽紅退遜花色。秋雨綠淨逾溪光。張郎酒行冠已側。笑道一年惟此夕。攜觴約客臨北池。指點塘坳欲鋪席。影先入水身誤從。影沒反訝身凌空。一花驚從足底紅。轉眼荷葉迷西東。誰云直下真無地。幸踏纖纖藕如臂。玩波一晌不出波。濃綠溪光若衣被。忽然一躍波已開。分手亂壁青莓苔。五曹不死亦可吟。多謝花朵擊魂回。

初九日早舊僕朱祿忽遭危疾卒將以是夕斂于旁舍余不忍視之因出巷至胡文學唐寓齋索飲醉甚

至二鼓始歸率賦一首

凌晨欲出門。一僕隕西牖。念其久追隨。不忍視棺匱。驅車出巷西。復東訪友十輩九不逢。雨聲蕭蕭促歸去。日晚方欣與君遇。主人不在客亦豪。胡時主程吏部振甲舍程前已出使呼酒半日辭無肴。充腸且復啖牛果。幸有菱栗兼梨桃。我前與君同里井。三十六峯懸倒景。烏聊山頭筍堪煮。更摘鄉園雨前茗。時吳上舍文桂出問政山筍及松蘿茶啖客千杯百杯酒不辭。簾角月已來絲絲。排頭生客座旁聽。鄉語拉雜愁難知。鼓聲隆隆街北響。我醉欲歸神忽愴。馬嘶聲苦步亦慵。瘦馬轉若憐疲童。居不見。魂燈已出門。藥帳猶在舍。世間百事皆代謝。新僕逡巡候檐下。

初十日吳上舍文桂邀津門李生爲余寫管領九秋圖爰贅以二絕句

管領秋花事可知。姚黃魏紫不同時。算來也被仙人妒。東海新教月上遲。籬前薄薄有花陰。小立居然爽客襟。一曲紅闌天萬里。是誰能識九秋心。

桂大令馥戴花騎象圖

與其北方騎囊佗。不若跨象踰牂柯。與其東中餐苜蓿。不若簪花撫蠻服。我官蠻服諳土風。民戴長吏同家翁。車前何必八騶列。象鼻舒卷如長虹。花枝紅紅罩官帽。六十使君猶若少。有時象背啞欲顛。惹得幼姬開口笑。祝君官滿無一錢。堆鬢花好垂吟肩。君不見。三年政成歸亦好。叱象北來耕海島。

趙大令希璜雲車飛步圖

我昔至盤谷。欲登王屋山。馬疲僕嬾不能到。日晚僅訪靈源還。是時閑雲逐歸鳥。天半夕陽紅不了。空林飛瀑影間之。襯得四山青裊裊。我亦欲乘雲中車。天門旁邊學步趨。舉頭見君忽大笑。已被怪風吹裂帽。張同年問陶夢月卷子

我夢久已闌。君夢乃方兆。斜月照天西。迢迢石牛道。此客支離極。隨人棄道旁。蓬蒿三五尺。中有竹匡牀。

陳布衣嵩詠篁軒卷子

深淺篔簹內。能令日氣青。四山飛瀑布。百道下巖扃。欲制安心法。聊攤種樹經。何人伴幽獨。螢火兩三星。卷施關久坐

園林千萬葉。如雨落漫漫。秋燕已無影。夜窗殊覺寒。小眠琴榻潤。閑步竹廊寬。只有西軒月。無人徹曙看。送張孝廉問安歸蜀

朝看東籬花。暮折北提柳。人生無根株。安得不奔走。張生年四十。抱道苦不偶。西顧有老親。曰歸覓升斗。窮秋霜霰集。戚戚聚儕耦。相對慘不歡。惟應市酒。君家難弟好。縱飲日濡首。長飢資薄俸。未足餬兄口。我意亦勸歸。名山闢窗牖。沉潛三十載。庶可冀不朽。努力盡一尊。西行寡良友。

邵進士葆祺邀集寓齋餞張孝廉卽席賦贈

邵生不特詩才逸。兼買黃花醉行客。就中行客我素知。西蜀才人張亥白。十餘年來詩道乖。正論往往參
俳諧。汪孫端光星術近亦輟吟詠。欲覓長句誰能佳。張郎令弟才如虎。酒後千言氣頗粗。只惜奇書束不觀。沉
酣自欲成千古。生成進士方少年。乃復憔悴長安眠。郎官上可應列宿。何必蓬島方神仙。聯吟快得閨中
友。豔體疊成三百首。壁人居處亦不凡。蠅螬裁扉月爲牖。花前揖客屢舉杯。客醉欲別花徘徊。攔門殘月
向東逗。興發尙能騎馬回。君不見。醉中歲月偏無據。落葉紛紛訝飛絮。東頭言八朝標折柬來。明日酒人
須復聚。

寓中獨坐

荒園倚古井。三折遠市塵。傍屋十數株。鳥巢多于人。蕭然一徑東南好。豈止無花且無草。堆檐黃葉一尺
深。下有著書人不老。

廿三日雪邵進士葆祺餉酒并約張同年問陶過卷施閣小飲別後復獨酌池上讀亡友黃景仁悔存軒
集至二鼓作

酒人攜酒來。賞我庭畔雪。我時方讀史。一卷粗已畢。掃茲盈尺地。相與坐林樾。風爐依土鏗。隨意雜陳設。
閒官兩移居。皆喜境孤絕。當時沉醉處。依約記庚戌。倏忽六七年。雲煙事生滅。橫街南北路。好友半天折。

謂邵學士。楊比部。如何不酣飲。坐待生白髮。君看空中花。真如電光掣。

淺醉不出門。送客竹籬畔。酒人從此去。蒼鼠亦隨竄。前車方越巷。後騎忽聲喚。俄頃人語希。來塗雪飄斷。移尊酌池上。看此冰欲泮。舊友隄上心。遂令齎無算。沉酣到中夜。空白忽欲暗。正好殘月來。光華與凌亂。題黃上舍恩長印譜

雅覺一拳堅。尙須八體摩。描試問誰工。此技山農谷口三。橋叔孫不朽三事。江夏無雙一人。文苑儒林藝術。恐君難以分身。

送黃戶部鉞乞假還蕪湖

黃生通籍久而乏仕進意。郎官才半歲。堅欲潔歸計。乞閑書既允。偃臥無一事。歸日萬斛濤。空明洗胷次。築屋古鳩茲。于焉可終老。苦無江上田。可刈霜前稻。仍然攜襤被。遠復客江島。時將遊皖江。一世無相知。何人

識飢飽。

十一月十四夜卷施閣待月適蔣表弟良書以惠泉酒索售因留飲至醉作

所居偏西南。十日寡良友。今夜明月圓。清輝殊膩手。蔣生叩門人。半日俯其首。索我助急裝。餉我一尊酒。開尊與酬酢。鄉味汝知否。移坐石屋中。清談亦云久。苦言辭我去。相送出門走。夜半西北風。泠泠吹笑口。十六夜獨坐玩月至四鼓。月食詣太常寺隨班行禮。

全家既南歸。一婢攜向北。欣聞月當頭。爲我具肴核。軒墀開左右。雲向瑣窻白。古木十數株。居然富泉石。攜壺隨處坐。淺醉不終夕。官閑乏塵事。敢尙曠厥職。三更驅羸車。入寺救月食。

感舊

忍向三生石畔過。此情除有劫能磨。愁中花月催人老。夢後樓臺易主多。紫燕已聞移舊棟。白雲猶是宿層阿。惟將一掬東風淚。和雨和煙逐逝波。

胡上舍唐屬題夢李昌谷圖卽戲效昌谷體

古錦裁作囊。時嘔心中血。古錦裁作被。時縈夢中結。江南仙客夢隴西。魂氣上覺南山低。左耳黃河聲。右耳瀉滄海。塵飛接黃雲。如鉤月沉采。闌干十二行不前。轉眼已及三千年。玉京路向瑤池直。金虎玉龍攔不得。却怪仙人酒面紅。映天天作桃花色。清虛帝所宅。何有白玉樓。一語道破天應愁。天公愁。山鬼笑。神雞亂嚼星斗完。飛上燭龍頭上叫。夢中授受詩百篇。只借東壁爲長箋。從茲投溷詩。仍須出人間。來何翩。翩去何遽。出戶有光團若絮。長爪纖纖破天去。

東錢三維喬

竹初庵主近如何。習靜翻憐歲月磨。到枕水雲清夢適。應門汀鶴道心多。黃金久已欺中壘。白璧誰能剖卞和。君前宰鄞縣。爲接任者所累。大爲上官白眼。一片五湖千頃月。收帆擬共著漁簑。

夢入從舅氏白雲溪舊宅感賦長句

一半軒窗面水隈。已涼頻奉板輿來。簾從碧月光中捲。花向紅雲影裏開。分砌紙燈搜蟋蟀。過汀蠟屐點莓苔。歡場總被風吹散。贏得春宵夢百回。

張烈婦詩

烈婦王氏。余友人張大令景運之子婦。文學慧裕之妻也。慧裕以勤學得瘵疾。氏割肱療之。不愈。卒後一月。氏繪夫像于壁。雉經其側以殉。

張烈婦。交河人。年二十歸所天。所天勤讀書。氏亦助攻苦。朝聞雞喞喞。暮聽紉如鼓。所天學成病轉危。夢裏血淚時時垂。誰言色如花。匝月成死灰。叩天乞緩須臾死。割肉如丸啖夫子。臂創未合髻已髻。柰此出腹兒呱呱。嗟嗟一塊肉。敢累翁與姑。長跪向保母。願乞存遺孤。捐軀卻憶前三日。心事曾爲小姑說。翁姑有叔兒有母。地下良人待余久。神完志定反不忙。却掃東壁如銀光。七尺軀。牆上植。烈婦善繪事。先畫良人。像于壁。乃就旁繪。三尺繩。梁上直。墨光血光相對射。形影不離夫一尺。君不見。婦先兇。兒童烏。阿翁復作鬼。董孤。大令近作述異記數

種一家奇行皆堪圖。

偶成

哀樂中年詎可支。未衰恐已鬢添絲。遭讒真悔知名早。投隙方嫌見性遲。乍識面人偏入夢。不關心事忽

沉思平生學行吾能審。豈待悠悠論定時。
百種芟除癖尙留。閉門索句出門遊。研摩未及唐餘史。蹤跡粗窮禹九州。胸次漸能忘寵辱。舌鋒從不快
恩讐。白雲溪畔三間屋。略有頭銜好乞休。
間來屈指溯從前。孤露餘生我自憐。平輩半皆成老宿。故人多已學神仙。難忘硯北千秋業。卻有城南二
頃田。一事冷官差可慰。趨朝常得弟隨肩。
亘亘平生一寸心。不同朝士竟升沉。憑誰可解胷中結。倩客時彈海上琴。乞與藥罇希駐景。肯從鹿網索
知音。南舟北馬頻來往。坐使勞勞變古今。

廿五日雪

蓬門且喜絕將迎。繞砌南頭自在行。一片廣場三畝雪。好同心地證空明。
十二月十九日卷施閣招同人祀蘇文忠公卽席賦一章並邀諸人同作
七百年來彈指過。又隨裙屐壽東坡。生天至竟誰能免。傳世如公庶不磨。香篆曷時詩思入。風簾開處雪
花多。狂吟痛飲君休惜。不見勞人鬢已皤。謂吳侍讀錫麟時以病未至。
小除日邀同吳侍讀錫麟戴吉士殿泗趙舍人懷玉溫舍人汝能方比部體劉舍人錫五伊比部秉綬葉
舍人繼雯張檢討問陶彭明經蕙交戴禮部敦元集卷施閣祭詩作

洪生除日築兩臺。鋪糟避債人俱來。客來不來豈須速。先注滿堂銀蠟燭。歲聿云暮興轉高。分半債帥兼詩豪。卷施之門如鐵立。百輩申頭不容入。側聞門外客。暗數堂中人。九州仙客萃一門。休嫌坐上賓僚少。閩粵楚吳兼蜀趙。坐中十二人。凡四川湖北廣東福建山西浙江安徽江蘇共八省。無端聚飲衆。或嗤。轉假舊例稱祭詩。多逾二百篇。少乃十數首。吾曹自有傳世資。不藉詩篇成不朽。燭花分從肩上飛。蠟淚滿滿堆春衣。忽驚屋後雷聲墮。四面紙窻齊欲破。山雌水母并入肴。遠有吳客貽車螯。百壺不嫌多。一觴不言寡。夜半清談振檐瓦。肉拌貂酒汚茵。脫略極處無人噴。明宵莫守庚申歲。後日早朝纔破醉。

偶成

客來半不知名姓。到卽隨堂住幾時。醉後忽然長揖去。主人不問僕難知。破工夫把蜀茶煎。一枕新涼乍欲眠。不合約他狂道士。騎驢直到竹牀前。

卷施閣詩卷第十八

侍學三天集丁巳

正月十四日雪霽溫舍人汝能招飲分韻得兼字

且插梅花壓帽檐。乍來香氣欲衝簾。籠街月與燈光合。繞砌霜將雪色兼。縱飲未妨朝客罵。朗吟生怕夜鳥嫌。千言一例輕揮灑。已有春華上筆尖。

十五夜琉璃廠步月

一市人如海。塵從隙處穿。帷車排巷窄。社火壓場圓。濁酒呼朋飲。奇聞藉客傳。欲尋容足地。飛爆向肩然。

元夕有懷四首

半生思紀外家聞。朱文公有外家紀聞。清淚時時滴典墳。十六人中留上壽。舅氏再從兄弟共十六人。惟舅氏屆八十。七千里外寄奇文。

予典學貴州時。舅氏將生平所述。寄存余處。難忘閣上三更月。只占溪南一塢雲。莫晒霸陵亭醉尉。阿誰能識李將軍。憶州倅舅氏。

一居闌闌一居鄉。零落年來姊妹行。少賤每教通世故。長貧時與話家常。封書寄弟箋曾溼。對鏡梳頭髮

已蒼。腸斷邗溝東去路。適汪氏二姊下世。已及十六年。所居天井巷小樓。屢過之。不忍登也。小樓空鎖月昏黃。憶姊。

晴暉橋北學場東。竹屋時時與夢通。砌繞石泉三寸碧。窻分梅蕊一株紅。已將複閣棲嬌女。可有新詞寄

阿翁猶憶北行牽。袂處萬家燈火五更風。憶女。余以庚戌元夕北上。

故人生子我生孫。世執還應擬弟昆。趙舍人得子最遲。僅長余孫一歲。竹馬跨時纔識路。紙鳶放處定當門。攤書已分傳

家業。學語差憐具。夙根遲汝長安來。繞膝看翁日日倒金尊。憶孫。

吳上舍文桂倚梅圖

黔南冀北走紅塵。昨夢江鄉正好春。何不石旁添畫我。承明同作憶梅人。

纔過燒燈無幾日。誤書殺雨我心驚。來札兩水日。誤書殺雨。多應仙客思家切。預想踏青人出城。

劉刺史大觀爲亡友黃二景仁刊悔存軒集八卷工竣感賦一首卽柬刺史

一瓣心香契獨神。此公高義出風塵。應憐少日齊名者。已作千秋傳世人。檢點溪山餘笠屐。刪除花月少

精神。詩爲翁學士方綱所刪。凡稍涉綺語及飲酒諸詩皆不錄入。向平婚嫁爲君畢。君一子一女皆君沒後爲之婚嫁。亦擬穿雲訪列真。

題蕭照所繪宋高宗瑞應圖六幅

剩得東南半壁天。忍將奇瑞說從前。何曾楚壁能歸趙。轉使吳州又姓錢。朝野雜記。徽宗夢錢武肅王入宮而生光堯。內殿早

教飯繡佛。小朝真欲泣金僊。蕭郎落墨非無意。只畫樓臺夕照邊。

不少當時命世雄。橐鞬都覺有儒風。誰令密計參張愨。卻以中原付杜充。唾手燕雲時已異。傷心懷愨事

將同。茫茫一局全輸卻。轉悔飛棋入九宮。

天水南流讖不成。臨安城異汴州城。到來捷縱誇三矢。從此寒應在六更。未覺赤龍能踐夢。好防白鴈欲渝盟。冰天雪窖吾家事。坐使披圖百感生。

三月三日作

不妨衣冷更裝綿。十里衝寒籠玉鞭。到處雨猶零昨日。別來人乍入三天。是日入直書房情懷已分難成夢。消息緣知欲禁烟。只有御河橋畔柳。臨風裊裊試初眠。

送吳文學文桂旋里

我從黔中來。共子客京邸。君今新安去。是我舊鄉里。旄頭星落白虎傾。屈指井絡當銷兵。二千石吏倘奉法。五斗米賊何難平。金門索米空年載。無補于時亦思退。黃花半頃麥一畦。努力同輸太平稅。

送郭同年淳乞假還里

春秋三榜悉同年。入直同趨朵殿偏。手版竟思參俗吏。時同年外任者頗衆頭銜莫更說神仙。著書我續容齋筆。述

祖君賤爾雅篇。他日講堂來問訊。胥臺側畔越溪邊。

古意十首貽晉齋應教同作

魚遊濁水中。鳥宅高枝上。托身雖不同。遙遙亦相望。連枝新月出。鳥影波上漾。魚樂我自知。沿流擘輕浪。晨興必資餐。夕寢必資被。一身雖無多。物物無不備。從茲百年內。殊覺太繁費。當前欣各足。安用事心計。

微名在身後。亦以付天地。惟時把書讀。掩卷輒垂涕。持此一寸心。寥寥欲誰寄。

莫辭家出門。出門路卽岐。處旣誰可借。出亦誰可依。身非我之身。父母之所遺。敢學陳孟公。一世隨高低。松筠及桃李。羣焉托春風。先時及後凋。命意乃不同。桃李方華滋。松筠亦青葱。共結青帝知。幽芳閒香叢。榮悴任所操。不居造化功。所以深識人。澄觀悟初終。

五日一澣衣。十日一休沐。衆中常緩步。敢逞絕塵足。齋糧時告匱。祇復購薪束。不知何奇書。然火樓上讀。昨者臥復起。忽然心憂煎。前古與後古。一身居其間。責備之所歸。安得不懼焉。何以貽後來。何以承昔賢。當食三歎嗟。高懷惜徂年。反羨行路人。逐便可息肩。

繁星與望舒。晨夕麗天闕。司存各有在。取道亦殊別。如何百星光。難補員景缺。北斗亦自知。光輝不如月。我不爲神仙。非徒厭荒渺。亦恐過百年。事能生意表。閑居偶然夢。列闕事幽討。洪厓與浮丘。容顏那能好。微聞田橫客。近尙住仙島。畢竟忠義人。後天而不老。

人言記誦佳。不必炫文采。寧知華與實。兩兩實相待。生爲行祕書。一死究何在。何如能涉筆。自命可千載。締交數十年。夜夢隔魂魄。忽然來同心。半面成素識。神明苟相契。不在今與昔。孔程乍傾蓋。華管久分席。君看曹平陽。方延掃門客。

送鮑郎中之□乞假南歸

五年不復同簪筆。忽向東華語將別。高齋學士我自慙。長慶老郎君第一。廿年前憶夫容城。君官我尙爲書生。一篇君賦初月影。我把君卷時縱橫。十年前過昆陽驛。君作使星君尙客。八句君嘲退院僧。僧叱君詩倍珍惜。驛旁僧有娶妻生子者。君作詩嘲之。僧每舉以示客。竭來同宦曾幾時。君復僦屋鄰曹司。銜杯每苦暮鐘動。一僕一馬趨城遲。君寓內城。此回別君真草草。道遠飯君須及早。練塘湖北蒜山西。他日訪君應未老。

西爽村雅集應教

平波三十頃。樓閣總如浮。聽雨來檐隙。穿雲歷樹頭。竹梢時礙鹿。花點欲驚鷗。不是春光滿。還疑雪苑遊。三雍開祕笈。萬畢述奇辭。古樂河間獻。新碑丞相斯。主人工小篆。時觀所撫嶧山碑。阜同分陝陌。水軼定昆池。喜值端居暇。賓筵酒不辭。

清明日同人各携酒至陶然亭餞吳侍讀錫麒分韻得郭字

今晨值清明。淺步不出郭。言登西南亭。稍覺筓鞋拓。窻櫺無用掩。空翠四垂幕。天半遞遠風。輕雲落如鶴。梨棠間桃杏。花暗一層閣。春蔬羅數十。所喜新意各。泥飲苦不豪。停觴歎離索。東瞻暨吳會。西念及商洛。時聞賊匪竄入魯山。如何遲露布。顧望期屢錯。吾子又告歸。心期渺誰託。中年富筋力。敢退事耕鑿。無容籌去住。且復視寥廓。客去酒忽醒。泠泠夏車鐸。閉門見花落有感。

塵勞擾擾復紛紛。卻掩重門杜見聞。入世早推能慮事。到頭何止僅工文。閒花積地驚三寸。薄酒澆愁祇一分。欲構草元亭未就。暫將奇字課劉棻。

晚坐

草花豔紫林花紅。胡蝶五色飛當中。刺梅黃更出墻角。白玉一樹嬌春風。藤床坐久春陰薄。香氣冥濛合成幕。忽地吹來雨腳斜。梨花樹上桃花落。

四月十一日綺春園雅集應教

名園一棹水泔泔。柳正披香草乍薰。畫舫已教延碧月。紫藤偏欲上青雲。欣傳檄報秦關捷。不礙顏從魯酒醺。雅有剡溪棹百幅。時觀成親王所書堂額亦乞寫卷施閣榜醉餘書許乞羊欣。

昆明湖水接天流。揖客都從水上頭。正好柳陰三弄笛。未妨花裏一登樓。迂疎尙荷賢王禮。擾攘誰分聖主憂。殘盜莫矜盤踞穩。早看飛將下神州。

趙忠毅鐵如意歌

三尺鐵作如意。誰其握之趙忠毅。惜哉公生明已季。委鬼茄花吹滿地。恨不擊王孟津。門生有此真亂羣。恨不擊烏程魏。故人子已成敗類。半生所遇總如此。悼歎公生不如死。鐵兮別主二百年。倔強宛若公生前。君不見我雖不見公。幸見公遺物。稜稜一方硯。凜凜三尺鐵。嗚呼二物偶流傳。想見公心如鐵石。

米圖南鐵笛歌

一聲遲。一聲疾。雲將穿。石欲裂。不知何人製頑鐵。百鍊鋼成三弄笛。空園初春。宵其無人。水際一曲。蛟龍
欠伸。排清風。出明月。樓高高。聲不絕。三更已還客興闌。百舌軟語花開顏。

望雨作

朝望雨。雨不來。烏鵲聲裏紅雲開。暮望雨。雨不下。柝聲茫茫星影瀉。五陁山。十日不出雲。赤日炙竄牛羊
羣。昆明湖。一旬水減尺。青草欲生魚鼈窟。東西紫陌飛麴塵。祈禱日煩兩聖人。君不見。安得檐頭雨如注。
更望驛西傳露布。時望陝西捷音甚切。

廿六日新雨後作

燕歸梁。雀歸牖。雅巢左邊鵲巢右。延回只有雙老烏。無樹無巢向空鬪。先生看雨出屋頭。破暝復聞呼婦
鳩。風聲蕭蕭葉聲亂。一尺鯉魚飛上岸。

頻夜起看殘月有作

少歲如新月。初三及上弦。最憐光滿夜。亦似客中年。齒髮今如此。情懷愈黯然。回回過宵半。判與看殘蟾。
偶成

殘月出半宵。殘客扶半醉。月從門外入。披牖與之對。客行旣不前。月影亦不退。何如鋪桃笙。就此月中睡。

澄懷園卽事十首

讀書樓上一燈紅。穿破疎簾入水中。隔牖乍驚錢庶子。誤疑殘夜月升東。

所居與錢庶子榮相接。

雨溼溪光畫不成。平堤百尺水雲生。過橋時有琤琤響。學士廳前落子聲。

張學士運暹與王侍講綬。裴編修謙。暇輒對局。

直廬遙對寺門開。童大理鳳三寓廬獨在澄懷園外。

分得西山一角來。載酒欲過童大理。十年重與話繁臺。

十年前曾同客開封。

八分日影上堦除。

張檢討綬出入每刻日影為度。

風動簾紋自卷舒。携得剡溪藤十幅。成王書罷定王書。

嫩涼時節雨初過。格子千行墨數螺。卻笑病餘陳贊善。萬全索書人比索逋多。

屈指風光五月前。蛙聲閣閣草綿綿。宮紗賜罷頒宮扇。日午傳宣集後天。

偶向花前共舉觴。自慙小戶遜三張。

謂學士及檢討綬。

花豬肉好梅蘇熟。更憶西頭達侍郎。

達侍郎兼人飲。僕兼人。

破曙同看入左門。金爐宿火尙餘溫。傳經不愧真司業。分課皇家五代孫。

邵司業玉清督課。嚴時分授。皇元孫經。

洗馬清談昔擅名。說經祭酒亦鏗鏗。闌干日午天風起。吹徹南來笑語聲。

謂王學士坦修。汪祭酒廷珍。

閒廩一畝富莓苔。正值花時借榻來。架卻紫藤扶住竹。清陰仍待主人回。

子應居西頭小樓。以牆字盡圯。暫假寓萬侍講承風直廬。

夜起

塔頭明月來。長徑一千尺。非比青松枝。欹斜不能直。

天中節近有懷里中景物并望家累入都

梅仁如豆杏如丸。桃實成拳砌滿盤。昨夜江船來海口。鱒魚三尺勸加餐。
薔薇一架後先開。不向墻根問蜀葵。襯得石榴紅更好。野鸞桃與土玫瑰。
睡覺西窗雨氣腥。戲將采線繫蜻蜓。聚頭扇子無多摺。自寫黃庭內景經。
石首江瑤總遜渠。品高入市故徐徐。銀鱗玉頰疑無骨。喚作人間團扇魚。
新蘗白酒透簾香。冰齒還嘗薜荔醬。卻謝水鄉三尺雨。楊梅深紫枇杷黃。
約伴同遊西漏湖。梳頭先費睡工夫。倦來不怕春魂覓。新貼紅梅閣上符。
蜀山鞭笞出林長。紫萁黃瓜取次嘗。兔麥上場蠶豆老。便乘舴艋醉新涼。
枕波樓閣止三椽。簫鼓盈盈咽一川。已是苧衣涼沁骨。更扶殘酒上燈船。
初三已是學堂空。競渡爭看出郭東。六角蒲葵三角黍。采絲穿就過天中。
不見津門信使回。小亭遲汝獨銜杯。船頭醉蟹船窗酒。可穀而翁消夏來。

山行雜詠

人從窻裏臥。塔向門外立。忽然塔上人。欲與窻間揖。檐鈴吹笑語。高下勢不及。無由寄真意。飄此頭上笠。
一响乘便風。翩然墮階級。

空園半畝花。左右交虎迹。清晨客初來。怪鳥啼屋脊。心空忘喜懼。卽此鋪尺席。鳥亦竟遠飛。虎亦不前逼。

始知忘機人物外有真適。

船從西岸行。馬向岸東走。魚從急溜下。三者勢若湊。中流微約略。十步拒前後。魚沉倏無影。馬倦亦難驟。客意正苦吟。沿流一篇就。

山樵本無家。隨意向山宿。忽于鴉巢外。突出半間屋。上竄蹀與颺。下復走麋鹿。樵薪堆一岸。意倦亦託足。縷縷飛爨煙。應知飯初熟。

斜陽半天紅。雨氣半天黑。冥冥紅黑交。蠓螋橫百尺。仍然雨難下。依舊幻晴色。須臾雲黑處。透出星漢白。野老涕不休。低頭對原麥。

一塢寄塵外。謂有田堪耕。豺狼多于人。見慣亦不驚。客至主染疴。閉戶絕送迎。連呼強之出。先把門扉撐。荒寒信難居。滿頰莓苔生。

出谷雨聲碎。入谷雲光肥。一出一入中。蝴蝶雜客飛。疲蹤欲誰投。暫借雲所棲。一川饒怪蛇。百鳥噤不啼。何因知宵昏。庶賴警曙鷄。

橋東與橋西。破曙一招手。前行殊未覩。隔此水楊柳。荒荒行半日。月落斷山口。居人方啓戶。行者倦奔走。勸客盍早餐。山桃實如斗。

四望悉無見。松杉與檐齊。亂石黑半天。壓此眉睫低。石竅出一門。何能辨東西。居人耕山田。盡向屋脊騎。

勸客早出山。雲生路當迷。

迷途忘高低。蠟屐向空墮。濛濛倒生竹。衣袂牽向左。欲尋人跡問。半里斷烟火。沿流聊徙倚。缺處雲落朵。古廟無神靈。牛羊占高坐。

午日拜紗葛香藥之賜紀恩一首

弱冠爲人師。逮今幾卅年。人言紳佩榮。簪毫入中天。經傳聖人孫。戍削甫及肩。朝朝食天廚。蠶鹽夢仍牽。日午宣賜來。鵠立朵殿邊。繽紛香藥丸。紗葛欣有聯。纔出內左門。傳宣復連翩。俯念節物佳。當食更賜鮮。是日並蒙賜克食。我苦無母遺。承恩涕淪漣。會當家祭時。持此告寢筵。

偈側行同金秀才學蓮作題亡友黃二悔存詩集後

偈側復偈側。住世纔幾日。朝吟山頭魂。暮委泉下骨。偈側行。歌黃郎。黃郎五歲始識字。十五十六能文章。十七試冠軍。十八登詞場。十九客浙東。二十遊瀟湘。當其興發欲賦詩。寒暑昏旦皆忘之。山行麋鹿憎。水行蛟龍嗤。有時沿林覓句不知遠。前飛鷗鴉後獵犬。我疑蒼蒼位置皆得宜。獨出此人天不管。春非我春。秋非我秋。一世出不得。延回歷九州。大兒小兒亦何有。忽向燕臺訪屠狗。形疲骨瘦志已灰。偶爾一官頭上來。驅車入解梁。誓將涉咸陽。避責未築臺。塊然身遽亡。三十旣已逾。四十渺難得。赴君之喪哭君切。伶仃一棺詩數冊。此時偈側復偈側。巫咸岡雲四結。昆侖河濤百折。炎風蕭蕭雨聲急。又疑天爲詩人泣。詩

人亡後十五年。新鬼故鬼圍墳前。君亡後君配與太夫人皆相繼卒錦州刺史劉大觀獨抱一卷來長安。奉錢三百千。

一爲校刊姓名。一日長安市。交口誦君如未死。我頃聞之淚難止。卻憶石交疑隔世。楊大令趙舍人。里中

昔年稱等倫。此時憔悴百僚底。轉羨君名日邊起。偈側行誰所爲。金子亦豈人間才。浮名身後總如此。不

若未死常銜杯。一杯復一杯。偈側歌偈側。卻憶虞山山頭論。詩夕夜半神祠火雲赤。茲遊何期死生隔。嗚

呼茲遊真成死生隔。

送楊大令倫之官粵西

儒流誰說不知兵。躍馬提戈萬里行。猿鶴已堪成一隊。時以粵西軍務檢發知縣八人皆先後同行苗蠻從此乞餘生。愁經百

驛先頭白。官比雙江徹底清。莫忘鵝籠舊時事。夜寒風細擁孤檠。

南行飛雨北飛沙。三十年來事若麻。笑我尙難忘輩行。羨君先已富才華。論詩未欲輸餘子。破涕先聞說

外家。姊弟數人天未住。君從洛中赴粵時蔣表兄鴻三久客洛陽表姊適繆氏者全家留滯粵西于君爲從舅氏及從母故井及之幾時商略泛歸槎。

戲簡陳侍講萬全四首。時陳新納姬人作詩索和

填門索字比催租。頗覺仙郎暇日無。添與玉人書紙仿。者番須破睡工夫。

偶然一語尙嬌羞。說到雙眠着意愁。比似早朝還起早。怕人簾底看梳頭。

昆明湖左路偏賒。下直偷歸日已斜。好事卻同錢庶子。五更雙巷響雷車。錢庶子榮直澄懷園每三日必歸卽于次日五鼓趨海淀入

直常以爲例君寓
居相近故戲及之

倦來鸚鵡替呼茶。不掩窗櫺看月華。我屬司香好調護。東風纔放二分花。

姪年十四

立秋前一日偕顏大令崇榘趙舍人懷玉侵曉詣太液池觀荷便訪法祭酒式善遂自德勝門徒步至西直門五里長河花事甚盛並過極樂寺勾亭久憇乃返

北斗未落天冥濛。騎馬獨入蕭齋中。夢醒拉客事遊覽。曉日未透觚稜東。三亭二十有四面。所喜面面花香通。豈惟花色艷如錦。魚尾亦閃明霞紅。此時夜色未全散。樓閣不受驕陽烘。石闌千落一千丈。月影星影穿玲瓏。斜枝面水結巢穩。鵲夢未破花香濃。荷盤承露亦殊好。珠光細碎磨鏡銅。偶然興發欲出郭。三里已至官河衝。背城人語太岑寂。繞砌百級喧鳴蟲。劉家亭子足清賞。細路曲折諮老農。斜行距水不三步。仄徑尙被蛛絲封。黃塵車馬鬧如織。閑處鷗鷺何從容。西山咫尺不容見。花挺高榦遮雙瞳。乍紅乍白乍深。色裁出片段非人功。環橋石勢門清削。花亦旋轉如長虹。池寬不放水波展。風蒲獵獵交水葦。迷行半晌始得路。歷盡豕欄兼牛宮。花前吟客果下馬。一一瘦步行偏工。寺門斜對御園闕。當午紅氣酣房櫳。欽環塞戶不容入。是日國花堂爲遊女所占僻巷走避衝斜風。瓜花斷路蓼橫徑。紫艷映水黃浮空。吐絲蟲碧轉丸黑。堆地棘刺仍叢叢。何來驟響刮客耳。別出水脈穿青松。僧房盡處避人坐。瓜果一任僧攤供。開窗望雨不能得。雷鼓隱隱聲隆隆。冰盤磊落高數尺。蠅蚋半日潛無蹤。良朋屢約期屢誤。世事何苦填心胸。團蕉臥

久僕夫促來趁斜月歸聞鐘回車頓覺有秋意。一葉正墮青梧桐。

二十日早章大令學濂邀遊積水潭看荷同人分韻得光字

十里長河匯作塘。馬嘶人語看花忙。能閑客總神仙侶。當曉潭交日月光。斷札幾行留黯淡。

時展舊遊長卷見亡友王

友亮通副所作看荷詩喬松千尺揖青蒼。惟應薄醉牽船好。消受荷花面面涼。

跋方布衣薰所作春水居長卷後

方居士性本孤。畫水不畫舟。畫岸不畫廬。縱然畫屋僅結茅。前後左右皆禽巢。一身居其間。意態何嚶嚶。縱然畫舟僅一葉。四面風聲水聲接。掉船何所之。似欲出六合。春林綠重煙濛濛。初日淡作胭脂紅。杜門百事不挂意。闢牖自與天光通。方居士富有千頃波。貴作五湖伯。朝吟晚吟同蟋蟀。夜窗無人電光擲。人立大魚時揖客。不爾前灘訪鷓鴣。偶然興發作此圖。一筆卽已環全湖。全湖盡處青無數。知是君家家前樹。我與居士交。恨未及往還。手訂居士詩。不識居士顏。他時我訪湖西宅。爲補四圍松與柏。君不見飛去飛來寒鷺絲。渾疑弔客衣冠白。

七月朔日雨竟日夜不止作此排悶

一夜蕭蕭雨。開門水倒流。亂雲穿斗拱。野鳥宿簾鉤。兵甲真堪洗。櫓槍尙未收。似聞宵旰慮。仍在益梁州。苦雨待客不至戲成

五更雨急檐頭衝。壞垣倒屋聲洶洶。起尋蠟屐出門看。半里曳入塗泥中。西家床頭索瓦瓶。東巷歷歷排
墻聲。重來輦轂又逾歲。天漏似向黔中行。吾家老屋常掩關。壁倒已覺無遮欄。獨愁苦霧翳天半。咫尺不
見西頭山。冷官百事皆相左。折柬偏言此晨可。齋廚無蔬爨無火。拒客先將巷門鎖。寧知客念亦早灰。侵
曉誰肯衝泥來。廠橋西門水三尺。到亦叱馭驅車回。水聲冷冷沒及髀。掩書無聊酒時把。一杯未已復一
杯。忽爾風狂墮飛瓦。君不見。天公此意知者寡。要向西南洗兵馬。

哭愍孫

爾病真難起。吾衰久矣夫。猶應阿兄在。次子盼孫于壬子秋薨于京邸。莫嘆夜臺孤。世業憑誰振。重慈藉汝扶。傷心厝棺

地。夕照滿平蕪。盼孫棺厝于城西夕照寺。今亦當同。

詩家詩

無錫顧兵備光旭。選刻同縣人詩爲一集。其剩稿賈上舍崧乞得之。爲卜地瘞于梁溪之側。三伏日走
數千里爲索詩。可云好事矣。爰爲賦四絕句。

側柏疎梅插滿塋。三千里路走燕京。不知何預先生事。肯爲詩人觸熱行。
身後浮名定有無。尙餘清淚灑平蕪。他年地下傳文苑。此事真推鬼董狐。
少日齊名顧虎頭。老來吳質倍工愁。顧進士敏恒。吳明經麟。仙于梁溪。詩人爲最。九原珠玉終難瘞。合置中郎與發丘。

不結詩人結酒人。邇來麴蘖更沉淪。潘張陸左誰能識。有鍤須埋劉伯倫。
女貞行爲俞貞女作

無錫俞貞女。許字高郵金明經。蘭未幾。明經病卒。貞女誓以身殉。母兄防之苦。貞女畫女貞花一枝。題詩于上。以見意。不半歲。終以療疾卒。其兄孝廉坊爲索詩。爰賦此篇。

花莫作斷腸花。草莫作拔心草。拔心草死尤可憐。誰識斷腸花色好。俞貞女字金明經。二十待年仍未行。明經亡。貞女病。口不欲言。心已定。寫得一枝。祈絕命。不繫尺五組。不赴清冷淵。兒身雖可捐。母意殊拳拳。十旬百藥終無効。兒雖死。貞不傷孝。英英女貞樹。鬱鬱冬青枝。上有六出花。下有五色芝。君不見。斷腸可續死可生。不若此木尤堅貞。良人無年妾命促。手握此花方瞑目。萬古貞心托貞木。
同人約七夕。卷施閣小集。先作此代柬。

紅燭千條酒百瓶。石闌干外雨初停。人間未必輸天上。此夕虛堂聚德星。

七夕詞

今歲風波惡。濤衝星斗邊。時大雨連日。永定河決口。鴛鴦三十六。險欲上青天。

茅垣排東西。土室圯前後。只有天漢邊。紅牆尙依舊。

別夜雲軒斂。凌晨絳節移。年年當此夕。眞可說瓜期。

十一日同人集卷施行閣醉後作

十日無一客。客至必滿堂。十日無一樽。客來必千觴。主人愛客客亦知。皆競來早無來遲。鞭絲影拂稜稜瓦。洗手花前客停馬。淵魚林鳥盡不猜。客到先已穿池臺。茶爐聲喧話不足。失喜一林新果熟。雛童攀樹鳥啄枝。一徑先入紅參差。果中開筵忘爾我。上坐主人無不可。忽然客句矜速成。滿屋盡變爲吟聲。歡呼座中人。歷亂屋頭雨。驚雷掣電總不聞。銀燭如椽客圍語。須臾雨歇月滿廳。蠟屐攢響來窺楹。半廳人歸半廳坐。別掃一廳留客臥。金手山等皆留宿閣中。三更門索誰更牽。知是驚鳥夜飛過。

鳳仙

砌下亭亭立。應呼侍女花。綠須扶徑草。紅欲睨窗紗。逸榦零朝雨。芳心待月華。窺籬兩三種。因爾倍思家。
鷄冠

爾亦知時者。忘言得久安。未應憐鐵羽。空自揭高冠。秋實寧同味。幽花不並看。劉琨思起舞。側耳聽無端。
秋葵

八尺檐楹峻。枝高尙出楹。孤懷終自揭。仙掌曉來擎。似愧凌霜質。徒矜向日名。寧隨鮑莊子。別足有餘榮。
紅蓼

秋花雖自好。未比水花妍。紅紫分三徑。江湖別十年。舞風疎竹外。弄影夕陽前。不聽吳孃曲。從茲別夢牽。

秋海棠

何事腸俱斷。傾城色尙誇。春人兩行淚。秋雨一叢花。恨繞江郎筆。愁生蘇小家。蟲聲漫嗚咽。心緒正如麻。

玉簪花

秦關誰種玉。楚國尙亡簪。泣露冤難剖。埋蒿冷欲尋。淡宜涼月曉。閒稱古墻陰。似有泠泠響。風前荅素琴。

十七日驚聞畢尙書師楚南之赴翌日于卷施閣中爲位而哭哀定賦詩六章卽寄莊邠州忻錢乾州拈陝西毛簡州大瀛四川孫兵備星衍山東楊靈州芳燦甘肅方伯揆貴州楊大令倫廣西王大令復河南三十年來事都憑信史編。此生誰念我。九死欲呼天。計出朝班上。魂歸夕照邊。報公惟砥節。方不負名賢。

死不爲公恨。傷公未盡才。潢池仍待勦。衡嶽遽先頽。諸葛中年隕。文淵半道摧。世儒真淺識。猶望歷三台。

由來三楚事。終始一人支。微管功寧泯。亡彭讖獨奇。公少時術士言公官楚南日卽當謝世蓋合公姓名爲讖也。夜星驚櫪馬。秋霧濕牙旗。千百孤寒淚。從今灑路岐。

遺大投艱後。羣疑衆謗中。萬言陳至計。

公去歲請撤湖南兵專勦湖北疏入上嘉其盡誠。

一死遂孤忠。分野旄頭落。盤門羽檄通。

蠻民商配食。先在伏波宮。

老每思巖壑。君恩未賜環。回天心獨苦。匝月鬢都班。公體素強自籌楚事旬日鬢髮皆白事與元勳勒。封同五等頒。傷心別

時語。乙卯冬余自黔中報滿入都公留話三日方別原不計生還。

同人凡幾輩。白髮半應飄。訝絕全家計。半年以來公仲弟夫婦及冢墟房老皆相繼卒哀騰八月潮故小名潮生枕鞍書耿耿。歸櫬雨瀟瀟。他日虛堂宿。仍歌楚大招。

會都轉燠以六月廿一日集平山堂爲宋歐陽文忠生日設祀同人賦詩成帙并索亮吉詩因賦此

臨安祀東坡。邗上祀永叔。兩公政績猶在人。不特高名輩流服。異哉平山堂。乃祀和仲忘歐陽。予以癸巳甲午客揚

州權署臘月十九日曾兩隨衆于平山堂爲蘇文忠設祀門生風義古無匹。詎敢僭食來堂皇。千秋此論誰折衷。乃在七百年後曾南

豐。雖然文章節義謚並同。配食六一庶得肩山翁。此後君倘接武雙文忠。賓筵開酒人滿。太守風流逮都

轉。昔時門生今里閭。誰知誕日尤奇絕。君後公生纔兩日。陳八塘接邵伯湖。荷花世界昔所無。不羨奏樂

章。不羨祝嘏詞。只羨蜀岡岡頭三日讌。正直千朵萬朵紅。白花參差古來文福能兼少。況復身持節旄早

一輩才人座上多。二分明月揚州好。君不見我亦平生感舊遊。吟魂多在庾公樓。大星昨報前軍隕。昨得

尙書清淚揮殘天盡頭。君思歐公我思畢。同是龍門異今昔。十輩門生宦九州。謂莊似撰錢獻之孫淵如楊蓉裳荔裳諸同學感

恩一日頭俱白。王南寧。少林太守陳博士。禮堂學博我所思兮二三子。卻憶征南幕下人。一篇並寄吳江史。册庄文學

重哭尙書師

三日愁霖漲滿池。打門消息到偏遲。南來薏苡冤方白。北渡瓊瑰夢已知。無淚哭公惟有血。此身閱世詎

多時。平原賓客消沉盡。誰共筵前奠一卮。謂邵學士諸人

七夕夜坐戲擬古別離詞寄孫大山東

中歲念師友。懼或成晨星。晨星今亦稀。惟剩一啓明。啓明之東我則西。天末回首常淒迷。一回思君一回切。願滅光明作殘月。一月相隨得旬日。不然此滅彼復生。君爲啓明我長庚。昏旦相代東西行。我持此語思上告。織女黃姑愁未報。南極老人先大笑。

苦雨

十日雨不停。莓苔緣斗拱。虛堂蒸毒霧。梁燕欲移棟。居鄰斷煙爨。款戶求火種。爲言墻半圯。床榻陷成家。填街三尺水。決竇不旋踵。憂來展書坐。蟲喙集窗孔。心切望曉晴。偏驚橫蟬蝻。

贈楊州倅廷煥卽題其傳硯堂卷子

難兄薄宦久蹉跎。時令兄倫檢發廣西軍營萬里新從馬伏波。小別寂憐饒涕淚。半程相送越滹沱。傳家硯比兼金重。賣字錢無落葉多。我是孔融交兩世。一回展卷一摩挲。

八月廿二日侵曉出西便門抵海淀約任軍門承恩共遊西山因小憇官廨待法祭酒式善何水部道生作

我行月初升。甫到月未落。初日亦已輝。星光尙回薄。濛濛開濕霧。纔止巷南柝。官齋野花艷。隙地日開拓。早飯及射堂。紛然具羹臠。年豐饒稻蟹。且喜鱸新斫。傳觴休更緩。有約在巖壑。斜行車屢陷。溝水仍未涸。

周廬欣在望。便道一省度。園林甫修葺。昨已飾丹雘。笑指雲外樓。今成草元閣。時新修澄懷園。余已移居近光樓下。因便道入視。

循青龍橋北入山

高原無人居。千頃堆白日。前行驚眯眼。沿道飛石屑。流雲勢洶洶。意欲礙車轍。萬葉鼓北風。斜衝一門出。騎行既回互。徒步徑尤劣。絕險度一岡。同行儼相失。瓊璫諸石竅。往往野花苗。秋蟲與相間。竹徑亦幽絕。到覺萬仞湖。孤懸石樓末。

久憩龍神殿觀泉源并喜春海棠復開

墮薪天半落。知復有樵人。及此林花放。幽巖忽覺春。稍稍開宿雨。黯黯及蕭辰。三時金鑑影。五色莓苔文。土囊風既迅。石竇泉初分。松陰灑危殿。嵐光度寒門。層層凌曲磴。步步絕流塵。禪局雲欲活。初地鳥尤馴。百念此時寂。齋鐘亦不聞。

登蒼雪菴小軒望安定平則諸門并見白塔

松陰甫迎人。榭葉忽拒轍。土垣從東頽。了了露佛闕。旋螺方數轉。足險入石穴。欹斜臻層軒。眼界始突兀。窗櫺寧待啓。雲怒已飛出。重岡莽回環。幸有北口缺。奔流從此注。百里只一瞥。濛濛煙盡處。時逗人馬跡。心空無窒礙。木葉半俱脫。誰云飛鳥迅。詎若隙駒疾。危瞻七層塔。天際白如雪。斜日下九門。丹樓亦齊突。題羅山人聘爲周編修厚轅所作移居圖

人生安得如淮酒。更載奇書及嘉耦。書完一卷酒一杯。鶯燕一一飛前來。倦餘卽臥書函下。酒得美人斟較雅。我疑醉鄉日月不可遊。何意復戀鄉溫柔。或云藉銷奇氣憑萬卷。否則佐此情話須千甌。周郎舊乞金門假。重到蓬萊已三夏。偶然聚得薄笨車。家具如此方移家。酸寒頓改儒生素。玉軸金釵照衢路。遂令畫鬼羅兩峯。描繪人物仍能工。馬嘶塞路車填轍。一笑敵君如有術。以劍抵君書。以琴抵君妾。惟餘酒癖未盡忘。醉裏狂譚磨齒頰。雖然此客尤可防。倚酒或恐登君堂。書能目十行。酒亦吸一斗。把君奇書覆君甌。惹得美人開笑口。

八月廿九日抵澄懷園成親王枉騎過訪并辱贈詩謹賦此報謝

偶廁談經席。頻勞問字車。過汀喧列騎。入室噪棲鴉。土竈茶難熟。丹林日易斜。不因鄰禁籩。猶認野人家。
中秋日何民部元煨水部道生招同法祭酒式善伊比部秉綬趙舍人懷玉遊法源寺竟日
慈仁荒敗崇效遠。禪窟此間稱最古。維摩立地有丈六。傑閣去天纔尺五。三門乍啓通松徑。百步相連有花圃。虛堂僧健老復丁。靜夜人歸月亭午。

澄懷園九日

荒園秋盡景蕭騷。一半松林起怒濤。是處岡巒行已徧。破除今日不登高。

澄懷園夜起看月

卷簾列宿已全收。是處天光接水流。剩得一星隨一月。憑欄看到五更頭。
周廬三面麴塵清。風起雲生與地平。百步樓臺少人影。馬嘶聲和客吟聲。

管夫人墨竹

石徑空濛翠欲流。琅玕影裏雨初收。何緣不寫王孫草。多恐人饒故國愁。

澄懷園卽事

橫塘萬頃荷花死。蓮葉蓮根泣秋水。參差鴛瓦鋪新霜。螢火一夕收清光。
枯楊半掩窗前臥。抱葉寒蟬向空墮。湖東明月湖西來。綠窗此事開未開。

晚步

荒岡南去徑縱橫。半里斜飛落葉聲。惹得暮鴉成陣噪。夕陽人影樹頭生。

夜起

落葉驚人起。開軒月露迷。卻從行馬外。斜度濯龍西。萬樹風聲肅。千門燭焰低。
勞勞我何意。默坐聽荒鷄。

築屋

築屋臨官道。郵書鎖日馳。水寒雲去駛。天迥月來遲。劍閣初聞捷。荆門尙出師。
南征諸將士。知否抵恩施。澄懷園偕同人晚步

歸鴉已入林。未礙客幽尋。風遞千門響。雲飄四野陰。訪經蕭寺冷。照水石梁深。不是逢搖落。誰知天地心。

袁大令枚寄示擬戊午己未重宴鹿鳴瓊林詩二十首。率成十二絕。奉簡

唐代詩人推李杜。何曾雁塔得追陪。先生要吐前賢氣。兩向慈恩頂上來。

也逐遊塵上六街。不知早已脫芒屨。賓筵開處呦呦鹿。定帶長生苑內牌。

白首研摩事可憐。從來一第比登天。名經千佛雙番寫。始悟公眞劫外仙。

三月春光暖已回。五雲多處綺筵開。劉郎前度誰能識。錯認耆年賜第來。

一輩人皆上玉京。獨留老眼識羣英。先生遊戲蓬萊日。多恐諸賢盡未生。

憶昔追陪聞喜筵。記同上相說齊年。謂庚戌登第日。稔文恭公重赴禮部宴。不知此老來春宴。更有何人步謫仙。

卻笑從前向子平。苦留婚嫁晚經營。先生五岳書名徧。游戲重題雁塔名。

老去重登選佛場。此翁何似魯靈光。斷無門下門生在。有亦居然大父行。

宴罷瓊林走壁車。珠簾十里影橫斜。當時玉貌誰能識。只有宜春苑裏花。

短筇秋到倍精神。無數羣賢逐後塵。畢竟姮娥愛蒼老。桂枝全借白頭人。

屢枉山公問訊。林泉歲月一何淹。公與文成公阿桂同舉鄉試。今文成已辭世。少微不隕中台隕。始信公眞文福兼。

王母蟠桃歲月長。竭來屢見竊東方。曲江杏比瑤池實。也要先生三度嘗。

十月初六日同人集積善大令晚香精舍看菊并出古琴十六相示卽乞主人與何水部道生于花下撫琴率成長句

琴琴不同聲。花花不同色。琴標六代元。宋唐花放百枝黃。亦白。古琴泠泠一十六。其外蕭疎盡叢菊。琴囊滿墻花滿屋。一本花開彈一曲。主人豈止能愛琴。愛琴兼賞琴知音。何郎三十妙指法。花下一見先題襟。主人豈止能愛菊。尤愛看花人不俗。爲花築屋亦殊雅。別自扃門不煩僕。我生嗜古癖未忘。舊物先撫澄心堂。主人蓄唐琴三。其一卽澄心堂物也。題名元祐三十字。洗以菊水逾清光。灌花初完撫琴好。猶有春泥在長瓜。琴聲惜惜花裊裊。花韵都浮七絃表。客彈一回主一回。千朵萬朵花徘徊。罷琴置酒客不去。花下促坐傾千杯。琴停旣無聲。菊暝亦無影。主人離披客酩酊。明月入來窺藻井。

輓王大令復二首

昨得安陽札。安陽趙大令希璜。札來始得凶耗。連篇悼偃師。更憐交友少。已愧哭君遲。涕上猶相訊。孫大昨來札。尙詢君近狀。函關定

未期。錢州。未期。倅站。茫茫揮老淚。西向醕親知。謂畢尙書師及君。

中州民力竭。防賊又防河。屢處凋殘地。偏能惠愛多。敢期膺上計。終自拙催科。一卷新詩在。明明勞者歌。

李大令符清濮陽跨驢卷子

琴堂三月別。獨跨一驢來。面目都非是。衙胥各浪猜。詎知行役苦。安怪壯顏摧。他日傳循吏。推君利濟才。

乞友人作歲朝圖貽詒晉齋主人并綴四截句

窈窕房櫺水一彎。早春偶得著書閒。休嫌屋後峯巒峻。此是淮南大小山。
沿街都爲歲除忙。清絕城西半里坊。卻憶諸王勤問字。未妨門有束脩羊。
詒晉齋中一事無。幾聲爆竹歲將除。兒童簫鼓轟前後。不礙閑堂讀道書。
日晚天街跨馬回。小疲聊復舉深杯。房廊迤左休教掩。要盼西山臘雪來。

小除日章大令學濂遣人餉酒時適寫歲朝圖卻寄并附以詩

故人念我寒餉我酒一尊。關門不敢應。恐是催租人。催租人不來。送酒人踵至。
人汝亦大解事。主人官赤縣。騎馬日出城。百事逼歲除。猶能念友生。銜杯對盆梅。
報聊寫春風圖。博君元日笑。

時郭大令亦遣人餉酒及食物開顏對使盆前數日承餉盆梅四種此意何可

卷施閣詩卷第十九

全家南下集戍

偶成

黃埃飛百尺。難辨馬頭人。只有雲生處。都無一點塵。
三冬及半春。雪白不蓋地。遂令墻頭蒿。枯黃刺天際。

欲留不留歌贈張太守鳳枝

欲留不留。廠橋西頭。欲坐不坐。橫街斜左。攔門一人。龍鍾可憐。千里萬里。將戍極邊。念爲置酒。勸之加餐。
酒沾衣裳。淚落食料。高高三天。下者九地。一身居中。生死不易。白骨不朽。行當長征。冤心不剖。誰能暫生。
風吹車帷。高至屋脊。三更出門。聊與訣別。

人日讌客薄。醉聞韓孝廉崧及令弟觀察對招諸同人作消寒四集。因闌入痛飲。醉後孝廉兄弟屬題聽雨圖。率筆作長句應命。

一杯人日酒。醉我至元夕。君家兄弟皆可人。肯放非時款門客。款門客豈真酒狂。或者以醉韜其光。孝廉說我詩名好。比部訂交愁不早。滿堂華燈滿堂客。半不相知半相識。長安人海宦十年。屈指觴政皆居先。

閑坊冷巷行還坐。酒姬酒翁都識我。卽如今宵痛飲亦偶然。坐客握手一一稱前緣。忽然牛腰巨卷擲我前。屬我醉後放筆題長篇。繪圖伊誰馬秋葯。趙詩舍人頗詳盛詩略。侍御惇崇兄弟畫中兩人顏戍削。分案讀書分盞酌。聽雨木牀三隻腳。君不見長安八月無雨聲。屋脊祇有蓬蒿橫。愁君欲聽不得聽。此景令我思江城。吾家令弟昔抱關。作者共我趨朝還。尊羹鱸膾與莫過。先我一載還鄉山。觀君斯圖意相觸。我家亦有雲溪之老屋。雨聲琳琳如戛玉。不爾共泛吳船之百斛。聽雨層湖亦酣足。梁溪之酒傾百鍾。此樂豈與長安同。君今四十當建功。伯也亦是人中龍。縱饒有宅江水東。何暇聽雨眠孤篷。昏燈一盞簷漏重。千里百里雲頭濃。蕭蕭瑟瑟聲灑空。韻事合讓歸田翁。卷圖一笑生長風。

將乞假南歸仍于行寓種花蒔藕以貽來者戲題壁一首

雙橋口栽新柳。乞歸未遽歸。更種橫塘藕。寥寥春風不過短牆。團團明月剛滿曲廊。桃花踐。李花隄。海棠一株香絕奇。黃薔薇。紅郁李。紫藤花牽北窗裏。君不見。月月花開主人喜。種花人隔三千里。

澄懷園夜起作

前宵風。昨宵雨。一花初開鵲傳語。樓高榻冷夜不眠。紅燭艷艷光簾前。長安道上車輪駛。只有半宵聲暫止。三更向盡橫門開。枕上馬蹄聲已來。

卽事

一屋都無壁。禽聲四面穿。斷崖冰柱瘦。高樹日光圓。便作攤書舫。愁無載酒船。幽眠正酣處。促起聽傳宣。
十九日綺春園觀燈卽席應教

一燈迎人過橋去。忽有千燈萬燈聚。水中燈影乃益奇。百影已化千虹蜺。爆聲飛林鶻墮巢。火艷燭水魚
驚逃。樹頭彎環燈若橋。赤焰儼欲烘三霄。玻璃屏風八窗列。一房燈光疑入月。持燈作街上石梁。歷徧十
二空中廊。稍餘一角天光白。太乙星芒大逾尺。斜飛燈影復百枝。碧月欲升升不得。三更熾火列帳旁。酒
人門酒嫌酒涼。開窗意欲待殘月。不覺幕底飛新霜。廣場棱棱千步拓。大聲如雷轟爆竹。前行低頭穿壑
谷。百仞冰山穴其腹。裁冰爲鏡雪作燈。高下社火飛千層。禽蟲飛揚獸馳突。一半銀花穴中出。此生此樂
安得忘。好客況似陳思王。黃金堆盤一宵擲。昇平樂事寧易得。鄙人歸田有時日。欲與田間老農說。乘船
甫了復據鞍。歸路黑叢仍漫漫。昏燈入門僕驚瞬。蠟淚積冠高一寸。

花朝日作

橫塘燕驚相見。今日百花朝。花香無一片。塵暗地。愁漫天。鶯聲不來殊可憐。風連旬。霧連曉。半春豈止無
花鳥。踏青又恐無青草。

春日遊昆明湖

車輪遲。馬蹄遽。十騎斜穿碧雲去。山雲穿罷入水雲。鴨鷓天半飛成羣。闌干窈窕回廊複。山作屏風亦千

曲朝陽一縷透遠紅。卻被松杉罩深綠。牽牛亭北環橋東。八窗齊開迎八風。回途咫尺春波漲。燕剪都從馬頭颺。

清明日侵曉自南城抵澄懷園道中作

幽人春夢方迷曉。催客鴉聲出林早。持燈夜待門關開。一片曉霞城上來。橫門西來卅餘里。泥滑馬蹄聲不起。揩眼春光忽逼人。五雲樓閣桃花裏。

澄懷園早起

主人枕上眠方起。百種禽聲入窗裏。西飛殘月東飛星。花香此時偏杳冥。平明略約誰同過。一隻鷺絲人一箇。千門萬戶交春風。日影已射金鋪東。

三月初四日驚聞舍弟南中之訃。因準古人期功之喪去官。例乞假南回書此志痛。卽留別京邸同人。往昔期功例去官。聞喪何忍更盤桓。斯人詎料中年隕。異事偏留老眼看。宵學右軍先誓墓。欲同元伯一憑棺。鴿原已抱無窮戚。況聽荒鷄感萬端。

廿年彈指別親闈。此日初衣願已違。敢詡入山成遠志。轉傷無母寄當歸。餐螭縱後張長史。化鶴將隨丁令威。聞說草堂親購就。祇應分半貯斜暉。

西厓詩爲法式善祭酒賦

昨者法祭酒索我西厓詩。西厓以人重不在水一陂寂寥。今昔人斷續往來。水流波照。居人前後差濟美。相公居前朝。文作一代雄。祭酒生盛世。詩有三唐風。遂令東逝波。疊鑑苦吟影。厓前通長河。厓後冠西嶺。昨聞西厓上。別立雙梧門。非云塔級高。藉表壇坫尊。六月紅荷花。清光徹天地。高低千坡陀。日有百遊騎。君餐層湖藕。我飯北江稻。西厓去人遠。疑在五雲表。流波日以深。積土日以高。他時西厓名。與嶽爭嵒嶢。周孝廉邵蓮屬題羅山人聘所仿董北苑瀟湘卷子。

屢題瀟湘圖。一詣瀟湘境。瀟湘人不見。獨雁時相警。竭來得遇湘浦人。紙上瑟瑟秋將分。山樓颯風亭楚

頌。余在秋帆宮保節署八年。其題北苑瀟湘圖時在秦中。及題王蓬心太守仿本則在湖北。今宮保已下世。回望瀟湘轉增慟。萬事尋思縱如夢。

瀕行詣韓城座師話別兼憶舊遊卽席賦呈一首

汪于劉李。汪明經。劉于文學。汪編修。劉幕府。並蹉跎。歲月真隨東逝波。如許少年成老輩。記曾賓坐縱狂歌。

憂時早見扶鳩杖。賜第都堪設雀羅。與諸城相隔。巷清節亦同。差喜鄉關馳露布。元戎新已剪么麼。時姚之輔。齊王氏皆在陝西授

首。

洪懷園留別諸藩邸

草元亭外水粼粼。日晚軒車載酒頻。自覺漫郎饒意味。不妨要路絕依因。半春我約隨歸雁。一疏人傳批逆鱗。詎敢便尋忘世侶。報恩終擬剩閒身。

臨行張刺史鳳枝去送書此志別

蠻鄉血戰經三昔。慷慨故人多廟食。

謂軍門彭廷棟花連布諸人

南籠老守僅脫身。亦作西垂戍邊客。臨行握別淚不

流。荷校送我城南頭。東飛黃塵西掣電。不死他時會相見。

東方朔故里題壁

敢言竟比汲直巧。宦何如馬安。漢家自有法度。先生遊戲無端。

抵兖州日適孫大星衍自濟寧回署即日邀遊南樓席上賦贈

東武城南古兖州。暫停歸騎一登樓。奔鯨駭浪方迷目。

時河決口未合

野鶴閒雲偶掉頭。林壑總留他日約。

寧諸名勝以行促未果

神仙應妒此宵遊。試看百里賢人集。

時王石華張止原畢恬楊雲三王景桓劉震裳皆不期而集

會見祥光燭斗牛。

臨別戲贈孫大并索和章

時河臣以孫未諳河務奏離本任候補

少日齊名孫與洪。卽今相對儼衰翁。疏渠君苦桃花汛。蕩漿吾欣柳絮風。津吏幾時沉白馬。

時決口尙未合

詞臣

有客避青驄。

自余征邪教疏出每有京邸讜集居諫垣者必引避

十年共挂神仙籍。劫外居然勝劫中。

錢少詹大昕林屋夜遊圖

我携鐵杖遊林屋。此事如今及卅春。蝙蝠窟中時見日。蛟龍堆裏不逢人。竹籠貯火驚穿穴。石墨留名記

隔塵。便欲辦糗三百兩。徑從山脅上昆侖。

萬頃湖環三大州。飄然一葉忽西浮。要尋委宛奇書讀。真向嶙峋古洞遊。百里未妨通地肺。一拳先欲壓人頭。先生何事臨厓返。卻惹靈威笑不休。時同人皆至。隔凡惟先。生以足力不及中止。

靈巖謁畢尙書師墓。墓即水木。明瑟園。

奇勳久勒凌煙閣。遺愛猶留墮淚碑。公與古人爭不朽。我思前事感無涯。篋中章奏千篇富。屋後峯巒百尺垂。便擬一年來一度。野花村酒奠江湄。

虎丘謁白公祠。卽呈同年任太守兆炯。祠卽太守所建。

大歷才人剩此翁。百篇稍已變唐風。因思白傅談詩好。雅與生公說法同。言外自然參妙悟。箇中兼可喻童蒙。西昆詞格西江派。只惜彫鐫語太工。

同攀仙桂無多日。得蔭甘棠已十年。差喜故人皆守郡。時魏君成憲亦擢守揚州。可容傲吏早歸田。租船卽繫祠邊樹。築屋都模池上篇。何止政清詞筆麗。望君心跡繼前賢。

上海樞署與李兵備廷敬夜話卽席賦贈

八載重來訪素知。訝公頭白我添絲。樽前萬里投荒客。時牛太守稔文在坐。卽當赴雲南激江任。篋底千篇寓興詩。激電入樓

飛一瞬。怪風吹海立多時。更闌急遞書何數。只覺樓船出浦遲。時崇明狼山二鎮會。勦洋匪久未出海。

偕牛太守稔文范孝廉□至砲臺望海

激江太守老能奇。邀我同來陟翠微。人與魚龍爭奮迅。帆從鷗鷺各紛飛。天光澄碧遮眉宇。海色青紅上袂衣。便欲乘風向東去。空濛一點著魚磯。

將發上海寄王博士芑孫

我乘松江潮。欲泊松江郭。婦人連日酒。酒醒潮已落。仙人海上忽見招。要看六月飛寒濤。搜巖剔壑匪無事。窟穴恐有潛蛟逃。時正搜捕洋匪閒中賓從閒臺榭。難得羣公政多暇。李兵備連日邀客遊吳淞砲臺及葉氏園溪南笑指白雲生。

別有故人廬此下。

砲臺觀海歌

平生頗耽奇。欲出天地間。飛行忽履北閣巔。下已無地高惟天。目光遙遙百餘里。直送青天入波底。天波合處界盡明。一縷黃霧分空青。漫天重疊魚龍色。夕照沉沉不能赤。驚雷出海聲已收。似怯惡浪先回頭。忽然激電來如箭。一點微茫著洋面。海中黑子人盡驚。十萬煙火崇明城。更從此外尋源委。上已無天下無水。冥然孤坐閣上頭。靜攝耳目從天遊。鷺絲窺客久不去。或者疑我同眠鷗。客行將歸客不樂。自覺身心杳無托。回瀾萬里生遠風。一笠飛從海中落。

李兵備邀集葉氏園小集待客久不至贈楚僧鐵舟

一千章木生回風。邀我早集斯亭中。客來不來勞久待。閣外飛樓有僧在。我不待客先揖僧。僧握客臂從

東升僧言與客成三友。身外一琴年代久。橫琴在膝欲摘絃。忽有鼓吹來門前。

吳淞江道中雜詩

前山已挂龍。咫尺雨當到。危橋面西北。曲處可停棹。長年知燥濕。語每得其要。驚雷衝小暑。所慮伏秋潦。樵人驅牛羊。亦下山北道。

所居雲水鄉。鷗鷺共生長。全家生計足。一屋一魚網。門前雖有路。屋後別通舫。還因粗識字。不斷客來往。日昨雨沒竿。池寬鴨堪養。

海居壓海鮮。日日市江鮑。江魚餐亦厭。復把野蔬擷。商量釀村酒。知近插秧月。日午餉北田。雷喧雨飄忽。村女花滿頭。因之感時節。

一村據高阜。去海不千步。兒童忽驚傳。龍蟠廟中樹。遂令羊與犬。奔走出門戶。莓苔蒙塑像。久已斷香炷。日晚吹北風。前溪雨如注。

曲處排石林。欲把海潮捍。地形西漸下。人盡住東岸。西溪形製好。曲折啓山館。漁人網魚至。各各出門喚。再轉忽已迷。坡陀樹遮斷。

生死不相遠。十屋間一墳。街衢與巨隴。畛域無由分。連廬爨煙稀。燐火飛出門。客行阻風潮。繫艇枯樹根。牛亭月白時。鬼語時時聞。

感舊

往事只如昨。回頭已卅年。瑣窗曾瞰客。白髮遽垂肩。薛月冷無恙。花溪清可憐。傷心石橋立。南北數人煙。

九峯園感舊

一雨園林足。泉聲百道來。夕陽明蝶竦。高閣暗莓苔。燕繞橫塘楫。魚窺曲水杯。古藤應識我。親見五回開。

慧山酌第二泉

自來茲泉側。水厄乃不避。竹爐煎松明。靜聽蟹眼沸。一碗至百椀。走卒苦急遞。清涼生齒頰。兼復沁心肺。童奴皆竊笑。已破往時例。先生語童奴。汝太不解意。我重在山泉。兼之故鄉味。神清不思睡。偃仰借初地。村居卽事。

對面魚梭擲。回頭鵲羽驚。貪看過橋影。錯應隔牆聲。徑小穿林入。村斜割澗成。乍涼思午睡。隨意拂桃笙。

跋陳方伯奉茲敦拙堂詩後

杜陵叟作前輩。栗里翁真替人。我從東浦酌蠡。不向西江問津。門前彭蠡九派。屋後匡廬數峯。先生擲筆而起。章水貢水朝宗。累我長吟短諷。知君後樂先憂。所爲五字七字。不減嘉州道州。力厚欲蟠崧華。氣奇直薄星辰。眼空前古後古。膽破千人萬人。

後湖觀打魚歌

橫街一雨水急流。擔夫爭道趨湖頭。漁人挾具來尤早。背上一舟蓮葉小。舟輕入水若蹈空。一一漾出波心中。大魚蹴浪高于屋。尾急觸舟舟欲覆。一舟一槳去不停。倏爾舟散如浮萍。魚多網重收難住。突有一魚飛上樹。風聲離離水聲怒。半空鳥與魚爭路。跳波不已復擲波。來往倏忽疑穿梭。忽然脫網逃偏急。水面居然學人立。須臾風急帆亦收。千頭百頭齊入舟。鳴榔港口聲何數。泊岸舟多水先濁。舟人停舟魚赴壑。我縱非魚識魚樂。

晚靜閣聽山僧鏡澄彈琴

冥冥復濛濛。簾外雨絲小。移來烏木几。屈作琴牀好。先有剪刀聲。枯僧削長爪。一松覆一庭。空外怒濤集。寥寥琴韻起。松響時參入。風遞三兩聲。禽驚出巢立。

快園雅集

雨餘蠟屐集南城。竹樹蕭疎古意生。一徑野雲疑鶴影。半廊人語雜蟲聲。間中花氣穿簾入。坐上詩篇刻燭成。莫怪比來歡讌數。承明容易得歸耕。

水閣

秦淮一雨水初通。昨日江潮到關東。妾自拜星魚拜浪。夜涼同宿電光中。

白秋海棠

墮角離離殿衆芳。空濛影不上斜陽。孤花忘到色香味。一洗俗名稱斷腸。

題金文學捧閨客窗續筆後

蹤迹山巔及水涯。齊梁久客不思家。移居誰似先生便。頰上時懸鬼一車。

正是華年賦壯遊。靈奇都藉筆端收。小閒欲乞談天口。海外重繙大九州。

瓠巴鼓瑟伯牙琴。弦外泠泠得賞音。不譜談奇譜淳行。就中尤識掇時心。

屋後回環西小湖。談空時覺北街屠。謂屠刺史紳時亦著瑣姑雜記等書比鄰各逞如椽筆。爭作人間鬼董狐。

涉上相逢眼乍青。白門仍約共揚舲。空江夜靜煩揮塵。要使魚龍出水聽。

桃花洲歌贈王文學豫

北江入海我所家。從岸北望迷津涯。焦山金山兩圍抱。中有百里洲欹斜。南阡北阡路不賒。天遠水遠雲

難遮。平明日射三山腳。突出一洲如木杓。樓臺空濛樹依約。樓中居人益纖削。恍似連林鳥巢着。春江綠

淨磨青銅。黃鶴九子排屏風。桃花開時天地紅。桃花魚漾波玲瓏。下襯十里黃花叢。其外綠柳煙濛濛。花

朶盡處雲光濃。京江西北瓜步東。奇氣不盡歸魚龍。乃有逸士生其中。春來放棹春江側。載酒兩頭隨所

適。看海看山兼看客。船屋奚童飭吹笛。船後箏琶亦時摘。江神江神本相識。爲我春江展如席。

小西湖雅集

舫屋三兩間。門外立一塔。天風檜上來。泠泠語相答。案頭青綠堆浮屠。腳下十頃環靈湖。靈湖盡處大魚集。一一網出供山廚。眼前百輩奇人集。海外羈孤亦闌入。歸塗星黑雨欲來。空裏塔光飛九級。時座中有安南國遣人。

八月初七日秦司業承業招同座師劉少宰暨戴學使均元張侍講燾茅學士元銘李兵備廷敬許太守兆椿集隱仙菴看桂并聽王樸山道士彈琴丙夜乃返

平明欲出門。一巷忽飛雨。前行及山店。雲白穿縷縷。衫裳半日嵐氣濃。不覺已入雲當中。雲中道士爭相揖。天半一亭如斗笠。秋林蕭蕭冠蓋集。林外馬蹄盤百級。樓臺既參差。老桂復兩三。前身金粟本不凡。逸榦四出陵松杉。花梢棱稜度遠帆。花底客並能清談。側聞千年枝。化作兩童子。倏忽十數年。此生彼卽死。爲花爲人偶然耳。游戲人間乃如此。天風吹客不得休。忽然招我百尺之飛樓。樓房盡處繙書坐。宿露時從竹梢墮。瓊臺貝闕驚早寒。琴韻雜雨來無端。一聲遲回一聲疾。百鳥飛集紅闌干。紅闌干外零星地。認是臨春兼結綺。五條弦上六朝山。一夕分明感秋氣。天低月黑江怒潮。過嶺艸木聲蕭蕭。琴彈一曲續一曲。坐使江月復白江天高。樸山道士翻新譜。能令人歡令人苦。我願頑仙住世間。眼空不復知今古。琴聲欲畢滿進觴。琴韻復入杯中涼。鳴蛩百種陡然絕。飛雨瑟瑟鳴空廊。三更歸路誰能見。下嶺水波明一綫。

衝泥正欲尋冶城。如雨秋螢撲人面。

蔡明經元春天花亂落長卷

我從皇初平。曾詣蔡經宅。麻姑長爪亦出迎。啖以松花及桃實。翩然一別三十年。此老白髮都垂肩。半時挈我堂北語。苦詢雲中舊時侶。雲中舊侶散八州。時問楊蓉裳孫淵如近狀宦海出沒歸無舟。洪厓仙人格較優。許脫手板東南遊。坐君天花齋。臥看天花落。踟躕對影兩不俗。門內一翁門外鶴。

蠓磯夫人像爲方廉使昂賦

廟門斜對石磯開。一日靈潮兩度來。好屬錦鱗三十六。劉郎浦口寄書回。識力居然軼輩羣。卷中依約說三分。二喬莫更誇夫婿。天下英雄只使君。一舸翩翩下武昌。歸寧以後史難詳。惠陵松栢如南指。尙認江東作壻鄉。越羅猶認嫁時衣。花艸吳宮事已非。只有杜鵑啼血夜。江聲如哭撼危磯。吳頭楚尾路迢迢。豕國多年恨未銷。咫尺望夫山上石。一般心事付江潮。一賦驚鴻謗議騰。寓言詞客本難憑。洛川終古留遺恨。不及江波徹底澄。

蔣上舍徵蔚雨窗讀史圖

三百六十日。日日可讀書。晴日客苦多。不若雨斷途。堂東堂西檐漏徹。堂裏讀書盈一尺。朝研羣經莫諸

子。其外六時皆讀史。先生用目不用耳。一目驚看十行駛。客來百喚百不應。靜裏目光時透紙。驚雷掃戶雨瀉盆。何法可使先生聞。先生此時只閉門。但怪昏黑無朝暾。我今用耳不能目。目力雖衰尙耽讀。買山何不與君鄰。君日讀書吾耳熟。

友人屬題春山覓句圖

借得仙人屨。轆轤不知曾徧九州無。我慙結習除難盡。一岳遊成繪一圖。
疊嶂連峯春到遲。江南山淺好尋詩。野猿相見不相識。跳上月明松樹枝。

初九日侵曉至攝山。待劉少宰座師李兵備同年共遊最高峯及紫峯谷白鹿泉諸勝。竟日乃返。

別山二十年。夢寐松色古。松濤已出關。迎人至江滸。江雲欲上山。雲下紅紫壁。間相激射。泠泠清梵雲中出。五色樓臺不知夜。藍輿過嶺夢始醒。海日甫上天。鷄鳴山僧揖我樓前坐。無數馬嘶知客過。齋堂小憩路轉東。鶴蓋共歷高高峯。背峯乃識峯奇狀。百轉千回不容上。齋心既久身世空。峯頂飯罷聞疎鐘。綠雲庵紫峯谷。一石一雲看不足。桃花澗白鹿泉。一僧一客來偶然。謂許封君兆桂及僧默庵秋風吹山秋氣深。座上別念時時侵。東南良會有如此。屈指何日重幽尋。醉中飛觴益何急。怪石扶人向空立。出山南北不復知。松下頽然一長揖。

八月十五日晚聯舫邀方上舍正澍儲廣文潤書汪文學文錦暨諸名士至青溪泛月遂暢飲達旦醉中

作

隔岸先有月。隔舫先招呼。樓頭一燈淡欲無。月裏啼殺城頭烏。欲浮秦淮潮。雙鯉告潮歇。城烏約客東北行。去弄青溪古時月。一船送酒一舫迎。約客未至杯先傾。前舟阻淺勅勿停。抗手菱葦叢中行。橋高百尺樓千丈。紅袖居然出天上。三更已盡復四更。天上人聲雜鷄唱。水色飛上檻。月朶飛上梁。平堤南北亘無極。水月盡處交天光。荒荒城南隅。柝聲知欲盡。月照小姑祠。團團尙如鏡。我今欲問城上烏。青溪小姑汝識乎。六朝人物本如海。可有一客狂如吾。涼風吹水水拂衣。雙槳始復分頭飛。陸行爭輿水爭渡。送客未完天已曙。

廿九日邀同人至陳渡艸堂小集

陸行四里餘。水行乃三倍。登樓望江城。正與郭門背。西蠡河外通西瀉。引水入橋高數尺。秋林八月山果紅。山鳥啄墮溪流中。風吹欲出橋門鎖。鳥口啄殘魚腹果。園扉陰陰當晝開。主人不約客亦來。君不見滿堂花香客醕酌。網得一魚長似艇。

冒雨至錫山作

冥濛竹樹交成片。炊煙和雲不能辨。溪光淨處豁一橋。泉水下注聲如簫。山腰一抹人家少。山不能深徑偏杳。擡頭正喜山果肥。已有黃葉林間飛。

阮大令升基約遊陽羨山水先寄一首

五岳尋都徧。鄉山獨未遊。偶逢賢令尹。約共小句留。天外峯初現。雲邊翠欲收。年豐萬民樂。冠蓋亦探幽。

龍池寺

蒼蒼山已深。古木復回互。冥濛松樹杪。一綫日華吐。嶙峋盤百級。石碎馬蹄怒。危瞻斜壁外。飛瀑影微露。蓬蒿深十尺。已斷采樵路。雲光偶然開。石屋突無數。廚煙生胯下。岸仄窘回步。枯僧迎客遠。約共石梁渡。東西排梵篋。丹白別經注。盥手禮法壇。山精瞰庭戶。

善權洞

靈奇信無端。顯晦各一窟。高征摩蝠竅。俯視入蟲穴。攀枝禽共迅。履險螻同屈。峯峯環如螺。歷歷墮若蝨。樽罍亦奇古。甕盎別凹凸。危橋中偶斷。巨釜下先缺。導騎忽失聲。行童屢迷輟。微明空際下。怪響壁中出。石牀延客坐。了了察顛末。半晌出石樓。松梢已新月。

善權寺訪祝英臺讀書處及三生堂故址

百折溪流斷。藍輿束急裝。碧山迎客遠。紅樹導人忙。道戾侵官柳。臺荒倚女桑。三生益何渺。茶話此閒堂。

偶成

一度相思一舉杯。昨宵書到手難開。彎彎竹徑濛濛月。記得人來夢亦來。

偶向山中度歲華。浹旬春事已如麻。世情怪底闌珊甚。又報東風嫁杏花。

初八日斷橋晚步

閒從獨鶴行。偶與孤僧遇。落葉忽驚飛。衝人入林去。
南高峯上月。徐度北高峯。坐使全湖綠。都飛匣鏡中。

偶成

纔飲湖頭酒百杯。笳聲已向堞樓催。船船都載夕陽去。卻讓後湖新月來。
與陸七嵇三游湖卽送入城

諸公虎嘯我龍蹲。踏遍松杉竹柏根。但祈兩日作一日。不放夕陽紅對門。
城門不夜已吹笳。陸七嵇三盞到家。誰共湖頭飲春酒。德生菴裏華秋槎。

湖上作

朝看湖上山。一一雲中出。莫看湖上山。一一煙中沒。雲煙出沒不可常。雨後滿郭生青光。離離雲動山疑活。城縱界山山勢越。山腰樓閣一萬家。天半炊火紅如霞。山中望湖頭。一水明于鏡。紅樹千條罩鏡中。寥寥更落招提磬。窮冬十日湖上居。日飲湖水烹湖魚。人說客貌清而腴。客行時醉還時醒。卻愛看山復酩酊。城扉闔處興轉孤。飛出一城燈火影。

莫歸

湖頭淺醉歸來日。竹裏軒窗自在眠。不怕幽人夢難醒。夕陽紅到枕函邊。

余內直日與胡總憲高望直廬咫尺總憲沒及半年適余假歸以事至武陵與總憲遺櫬同日抵湖上厝屋又甚逼近不勝存沒今昔之感爰賦一詩哭之卽寄謝方伯啓昆馮鴻臚應榴二君皆總憲同年生也彈指人生歲月遷感公歸骨我歸田并無華屋棲恆榦自有清名過昔賢魂魄詎應淪九地班聯曾共直三天何因丹旆飄搖日又結居鄰水榭邊時以無居第櫬厝湖上

龍井小憩

山已深百折水亦曲百回。怪哉茲山巔石如飛來石腹中。偶虛欹斜寺門開。憇我雲中亭。悍石立萬堆。側坐不敢安。石恐頭上頽。所幸機事忘。魚鳥不我猜。深山十月中。香已逗古梅。冥坐歷片時。泉聲殷如雷。

靈隱山房浴

雲林信幽奇。古木互盤曲。到門途逼仄。忽復展地軸。嶙峋非意想。一石戴一屋。山僧穿飛廊。迅疾乃逾鹿。山房留客夢。山寺招客浴。詎止清我心。兼堪濯雙足。窮冬天地閉。水尙作春綠。浴罷望始驚。危樓挂深谷。

蘇文忠公祠二首卽呈秦同年瀛

詞卽秦所創

長篇千首恨雷同。近時學公詩者極多不無流弊不敢師公祇慕公。略有瓣香歸栗里。久因奇節說文忠。祠前蘋藻三時

潔屋外梅花一頃紅。擬作蜀遊仍未果。好移清夢入湖中。

只我重遊日。湖淤已歷時。倘尋良吏傳。并建白公祠。花發來時路。官饒去後思。他年商俎豆。到汝汝應知。

秦在浙中極有政聲。

秦同年瀛觀察浙江重新淮海先生祠落成索賦

君子淮海稱初祖。我距忠宣亦末孫。各有祠堂留浙嶺。互將詩筆溯淵源。廿年何愧蘇持節。百首先嗤陳閉門。今日奠公吾自忝。掃廳擬更潔清尊。

春溪垂釣圖爲秦同年賦

好向波心築釣磯。溪風吹鬢水滌衣。不妨分作江湖夢。魚已忘機客息機。文書堆案鬢添絲。忙裏能閒樂不支。三兩桃花一雙燕。伴渠垂釣覺多時。春濃魚不厭波寒。清切真如鏡裏看。知否太湖三萬頃。得歸隨爾把魚竿。

五柳居食魚

夢憶湖頭雙鯉魚。十年重向此幽居。溪童拍手還相識。卻繞紅闌引客裾。文窗窈窕夕陽鮮。一樣湖光落榻前。添得柳絲長百尺。隨風與客拂吟肩。

十一日待蔣大齊耀昆仲不至因買舟往御教場聖果寺

船船都不是。偏復到門前。別鼓尋幽艇。仍攜買酒錢。半湖搖落日。一棹破輕煙。到晚休相訪。山公醉欲眠。是日晚蔣裕之攜歌者相訪。遂至湖心亭及蘇公祠。痛飲醉中作。

偶攜春酒至湖頭。難得春人鏡裏遊。半舫賓朋誰是主。一隄風月尙疑秋。禽魚雅識閑中趣。絲竹都飄水上樓。爛醉莫辭歸去晚。斷橋掃榻待淹留。

月夜自湧金門泛湖至漱石居

城頭吹角促客行。客醉尙戀茶香清。關門持鑰不敢下。一燈遙遙出門罅。舟斜欲趁北岸風。月影已落南高峯。高低出沒十餘里。水面飄忽南屏鐘。湖心跳浪聲何急。魚厭波寒出波立。三更歸路月已昏。剩得一星明斗笠。

壑菴訪破迷和尚不值題壁

壑菴一石塞一壑。桂子石邊無數落。菴有香桂數株。種絕奇。我餐松子石上眠。初日正墮山窗前。山窗四面黏吟句。

挂壁木魚搖不住。松花飯熟僧不歸。聞說南屏訪師去。

十三夜自花神廟夜歸

南屏鐘未歇。且復小遲留。月黑花王殿。春生酒姬樓。朗吟驚宿鳥。緩步逐眠鷗。忽有千燈出。冥濛水盡頭。鳳皇山頂望江海及裏外湖作

湖水綠。江波黃。海氣五色浮空蒼。山形抱湖江抱山。大海東北仍回環。峯形南走連閩廣。百轉千回勢蒼
澗。回頭一望歎絕奇。十萬煙火山城低。南峯雄奇北峯峭。中有孤峯復回抱。茅菴煮茗歷少時。海口湖上
聲如馳。閒穿石罅玲瓏走。一半磨厓大如斗。前吳越。後建炎。王氣落落東南延。祇憐老樹心空早。欲問前
朝竟誰曉。朔風吹客下頂峯。峯面尙挂斜陽紅。君不見。南遷怪底營作宮。上有十二巫山峯。山頂有巨石
十二大皆數
十圍吳越時呼
爲排衙石卽此

長至日攜酒至葛嶺訪初陽臺半閑堂故址

昨訪閱古泉。今來半閑堂。小朝廷事碎如火。蘚石剝落誰能詳。初陽臺上初陽出。可惜蓬蒿沒山骨。仙翁
祠屋亦已歛。鼯鼠都從石龕穴。神仙畢竟不可爲。化鶴或恐仍歸來。試問葛稚川。何似丁令威。荒荒昔人
臺。落落今日酒。城中招客不得閒。地下寥寥呼死友。

由華津洞登蓮花峯

直石立作龕。橫石臥作廟。尤奇穿石樹。宛與石形肖。巉巖理斜出。阻客入深奧。彈碁形略具。伊昔誰所造。
擾擾此暫停。茫茫發孤嘯。陰厓落蟲篆。絕壁出鳥道。擡頭礙峯頂。側足限石竅。寧知雲路滑。欲下心尙掉。
齋心無妄念。平地冀可到。洗眼看北山。參差入斜照。

由鳳皇山半至勝果寺復從寺後尋石門及仙姑洞郭公泉升天梯諸勝

幽人欲移筇。石石先下嶺。前行三兩客。一一如墮窅。峯奇非意想。欲去屢延頸。玲瓏穿石罅。時漏夕陽影。飛樓當山腰。屋古極修整。升臺雖百級。坐處尙如井。搜奇興尤劇。屋後豁異境。雙扉斗然落。一水過清冷。迤西峯雜遝。欲往迫短景。空處忽有梯。延緣望山頂。

月夜從六橋歸

欲訪漁師舊釣磯。鐘聲沉水月光微。六橋行遍無人跡。楊柳居然挽客衣。

雲棲寺望五雲山并訪蓮池大師塔院

到來一谷雲。空白濕朝露。披雲尋絕磴。生翠落無數。濛濛萬竿竹。中有接天路。谷禽飛不透。怒欲攫雲住。巒岈正迷目。塔院忽回步。緇流吾豈識。重此本儒素。遺規尙堪仰。百代守其故。引泉來山門。飛雨屋上注。齋廚隨粥飯。不更關堂戶。衆生皆簡默。勞客久延佇。清磬出石房。悠然發靈悟。

向晚由徐家村至理安寺

理安萬株松。雲棲萬竿竹。理安較雲棲。山徑益深複。高低萬綠冥濛聚。攔住夕陽飛不去。歸鴉招客入。一林。山鳥噴人復相拒。千回百折上石臺。嵐翠膩屋扉難開。山僧總覺眉宇綠。古佛亦臥青莓苔。陡然一片山風惡。綴壁萬松搖欲落。厓危石峭路亦窮。松頂偶看支一闌。林梢一抹野火然。手拾松子煎山泉。紅查花開臘梅破。繞屋異香延客坐。

下石屋嶺徧遊石屋水樂諸洞

風聲遞水聲。松影接天影。千盤青雲梯。百折白石嶺。孤禽前若導。嘶馬後如警。危驚天半石。截若水中艇。東西列尊壘。高下別畦町。莊嚴三百輩。欄袂悉修整。恍疑泛滄溟。一一咸引領。滃然水聲出。古樂誰更省。齋心讀銅篆。洗眼摩石鼎。欲發僧苦留。遲歸僕頻請。

表忠觀拜錢武肅王像

不爲東帝只稱臣。江左眞王僅此人。故里錦衣殊赫奕。中原棋局太紛綸。州排十四疑無敵。弩射三千若有神。依舊吳宮好花月。遺民從未識煙塵。

躍馬提戈海上回。儒風早喜被江陔。年名不改唐天祐。國士能容羅秀才。使宅例皆除艸創。陌頭歌已報花開。門材百世猶全盛。時有文孫握節來。

靈巖山重展畢尙書墓感賦

江左方傳箭。天南佇洗兵。時聞川更馳新露布。無復舊書生。丘壑心徒戀。公屢欲遂巖巒氣未平。松杉識

人意。都作怒濤聲。

石湖戈氏園訪戈上舍襄復不值

一程趨水國。百折走巖扃。欲雪地先白。過雲峯轉青。怪禽摩絕壁。老鶴啄空汀。訪客仍難遇。空題石上銘。

小除日城東晚步

百事拋殘歲欲終。得閑聊復步城東。念沉清磬一聲外。影入歸鴉萬點中。疊港乍添新雨綠。小樓斜帶夕陽紅。道人正把雙扉關。知要堂西訪寓公。

崑山道中阻雨

時吳門友人
已有書相促

野禽飛不透。雲氣十分濃。夕照昏如此。前山路復重。遠煩馳越使。昨已發吳淞。到恐難拘日。遙槭莫早封。

臘月二十九日澹香斜月西堂告成招陸秀才繼輅等及兒子祭詩

年除百事費支持。檢點閒情付酒卮。卻約比鄰三陸到。掃廳同與祭新詩。瓣香同奉此清才。百樣春醪百種杯。要與先生洗寒瘦。迎神歌裏報花開。

卷施閣詩卷第二十

單車北上集己未

初九日楓橋訪袁上舍廷樞

挂帆東南行。百里祇瞬息。非徒訪疎梅。兼詣幽人宅。幽人宅傍寒山住。臘雪在門曾一顧。三條水涸今復通。依約門前繫舟樹。洞庭山人約客遊。鼓浪擬到湖東頭。吳船屈指須三宿。好插疎梅滿船屋。三鼓自木瀆放舟至胥口。

濛濛露未收。黯黯月方墮。三更欲渡湖。先此理征柂。幽人眠正熟。估客浪先破。微茫接天水。歷落綴星顆。感此一葉微。驚濤屢掀簸。披衣看曙色。早向柁樓坐。穿黑旅雁飛。聲從半空過。

自胥口渡湖

看山三十年。甫欲遂初服。閒居又經歲。人事苦拘束。竭來湖東頭。藉洗塵百斛。伸眉視初日。紅展鏡中綠。湖寬三萬頃。差足養心目。潛鱗方俯視。飛鳥忽高矚。物物各有天。忻忻遂其欲。空明無障礙。高下不局促。我亦心志怡。終朝坐船屋。何來南下客。苦欲附童僕。中坐忽告言。西南尙蠻觸。湖心遇風。

偶向篷窗臥。誰傳風色顛。情懷消短夢。身命付長年。浪已高千尺。衣纔濕半邊。奚童休股栗。險未及從前。
謂癸巳十月。

將至東山作

沿山半日行。欣此巖壑美。微覺風北來。千帆皆貼水。濛濛鷗鷺影。一半出蘆葦。亦有蚱蜢舟。船沿坐烏鬼。篷窗展衾枕。客倦臥移晷。神澹夢亦清。經時絕塵累。

暫憩東山麓

一塔高千丈。魚龍氣尙浮。灑空松柏暗。陟險鬼神愁。古佛依人臥。馴禽導客遊。面西窗莫啓。兀自濺驚流。
翠微禪院

東山白雲起。欲與西山接。寧知飛鳥路。亦向浮雲貼。蒼蒼幾重岡。一寺出山脅。登樓半無見。蔽此松柏葉。軒窗何玲瓏。橘柚貯重疊。回廊斜北啓。庶足展眉睫。穿牖出一燈。枯僧理經笈。

客夏孫總戎廷璧約遊東山以事未果新正八日訪梅鄧尉因便詣衙齋值他出不遇兩公子留住信宿意甚勤摯爰留別二首并呈總戎

爲有將軍約。來隨估客槎。半帆懸雪月。百里走風沙。公子欣除舍。疎梅正作花。夜闌銀燭裏。留與鬥新茶。憶昨吳淞浦。樓船出海遲。枕戈時待旦。橫槊偶題詩。豈意萑苻澤。頻煩組練師。報恩知有在。莫惜鬢如絲。

同孫公子錦暨令弟鑲至翠峯枕流閣訪梅

昨留漱石居。客冬寓西湖漱石居半月今訪枕流閣。川程逾十驛。勝地乃交錯。青松千丈接水隈。十步五步梅花開。僧

房盡處一株好。榦古錯落青莓苔。山凹石屋何鱗次。五騎如龍後先至。門開正值東北風。笑語吹入雲當中。客倦倚石牀。馬亦繫天井。一亭稜稜據山頂。主人敲詩僕烹茗。窗隙太湖三萬頃。

卽席贈程司理師樂

清絕程司理。官貧日課詩。心香原有屬。手板不曾持。肯作通方吏。寧爲多士師。時以課徒自給梅花三百首。風味

耐尋思。

鄭司馬時泰招飲賦贈一首

剖符殊不俗。分領此山中。屬吏如梅福。謂程司理通家得孔融。孫總戎父子快談當世事。饒有古人風。臨別仍相約。

同來訪石公。約夏牛遊西山

渡湖與鈕布衣樹玉同舟。因出其所著說文新附考。見示賦贈一首。卽束錢少詹大昕王給事念孫段明

府若膺孫兵備星衍

東山三萬戶。僅止一儒者。童年耽竹素。暇復討蒼正。說文五百部。寢食不暫捨。蠅頭排細字。時把心得寫。茅檐兩三層。住乃近橘社。家貧長物少。書反盈兩廈。扁舟偶相訪。坐久燭屢灺。口陳六書失。如水向盆瀉。

維時四座客。耳口若聾啞。二徐生唐末。不甚曉通假。諧聲兼會意。一一多苟且。強編新附字。合者蓋已寡。惟生糾厥失。證以毛鄭馬。隋音庶劉曹。唐疏陋孔賈。陵夷南北宋。棄置若土苴。長編侈稱引。又出張郭下。方今富儒術。小學亦婣雅。王錢暨孫段。見爾手定把。倚棹贈一篇。飄風忽飛瓦。

十三日鄧尉訪梅憶昔遊寄錢大令維喬蔣文學陳尊

昔遊錢蔣殊不閒。獨我近自山中還。連宵清夢屢飛越。聞說梅放西山灣。西山灣中萬樹花。古榦鬱勃枝交叉。山中猿鶴盡無恙。豈識世事紛如麻。艸元亭圯季重亡。謂楊比部夢符。吳上舍正健。天末回首思崔郎。景侃閒心檢點壁閒句。蝸篆剝蝕無偏旁。湖亭三面交遠風。香氣擾入湖光中。看花歲月苦難駐。花亦憔悴無歡容。君不見。看花背花立少時。別有會意誰能知。忽然大笑出山去。峯頂落落雲分馳。

光福鎮哭徐處士堅

魂歸萬樹梅花內。家在三更鶴唳中。我欲哭君無處所。半山殘月滿湖風。

過鄧尉感舊

首春來吳門。訪客入雲榭。相邀攜蠟屐。告我苦無暇。寧知人事改。歲月屢代謝。別來山中客。已葬山花下。摩挲墳上樹。一半梅枝亞。花光縱奇麗。未肯照長夜。念寂獨舉杯。初陽出林罅。

元墓小憩

穿林十里只一鞭。花影灑地松浮天。松濤覆屋客眠穩。夢覺香氣來無邊。波流到戶聲先約。花影入波魚誤嚼。松間客倦欲少休。且汲寒泉樹木杓。

香雪海久坐

下方蠟屐聲何急。卻惹山禽出巢立。山禽欲下客徑登。相與驚此岡三層。風吹花氣入遠空。一半上接山雲紅。君不見。人間清福消未易。幸是玉皇香案吏。

北行

三月束裝歸。二月束裝發。出門才十稔。抵家無白日。昨爲弟喪歸。今爲國喪出。我勞何敢憚。我淚忽鳴咽。揮淚北向行。程程冒風雪。

已爲還山雲。復作出山水。看雲心尙戀。照水色增愧。親朋苦留餞。臨發期敢改。前行誰與共。一僕瘦如鬼。初日上蒜山。回頭望東海。

過沂水橋東族孫梧二月十二日

沂河之水清且徐。先二十日來。祓除風光春半尙未足。鶯燕見客猶生疎。參差流水兼修竹。綠映橋南萬家屋。橫流昨歲喜乍平。數郡創痍漸將復。時以曹縣河決鄰郡皆助工作路人爲言太守賢。貪吏昨已褫歸田。君不見。吾宗兩守皆稱職。記否趙人思順德。君兄樸守順德有惠政

別敖陽鎮二日。敖山尙可見。因題壁。

茲山雖一拳。青出天地外。連晨走三驛。路已及新泰。瞻山仍在目。風尙送清籟。迤南方數武。蒙嶺亘如帶。再轉望始迷。翻嫌去程快。

羊流店望俗

精誠與山通。百里覺迅速。夜半岱頂雲。飛來冒車屋。冥濛雲皺處。顧視炫心目。月出斗柄東。森然衆山綠。青松一千丈。霞采時斷續。想有飛仙人。排空走如鹿。

夜半忽大風。雪驚雷徹曉。

三更驚雷奔。忽復雪沒膝。神區信靈異。寒暑一夕出。狂飈來若怒。激電去如掣。稜稜檐瓦落。歷歷冰柱折。思沾山後酒。屢斷門外轍。遙程瞻尤驚。一白色突兀。

將至泰安于崔莊驛壁敬讀太上皇遺誥泣賦一首

平明欲出門。青氣已四布。崔莊行廿里。木末天始曙。驚傳上皇誥。涕泣滿行路。黃縑曳三丈。急遞頒鎮戍。山崩川復潰。此事關氣數。茲方當孔道。八見翠華駐。成功告天地。神亦被休祚。今來山色改。慘戚若蒙霧。時嘗春仲後。急雪匪無故。神人哀痛切。井邑先縞素。微臣等蟻蝨。夙昔感恩顧。俄焉驚過密。旬日急奔赴。山靈鑒微誠。恍若導前步。百里行不休。橫流馬驚渡。

山雲

濛濛四山雲。欲出不敢出。回瞻岱宗上。白練飛一匹。一匹白練當空馳。四山出雲圍繞之。君不見。出山爲霖未可知。何日更是歸山時。

泰山道中五首

茲山亘東方。鬱勃截生氣。虛輪扇風海。空腹入天地。其高無端倪。一半植空際。滃滃雲出始。曩若絲髮細。俄焉分道騁。寰宇悉衣被。洪荒迨今日。年代渺誰記。登封壇數尺。藉以驗興替。允哉神明區。心精默相契。山人渡海來。告我山勢尊。波面日出時。與山相吐吞。遙看不知山。謂是天有根。峯棱破空垂。倒挂日月輪。青冥一氣中。高下固不分。伊誰啓鴻濛。當有主者存。雙厓劃然開。截作天東門。一山戴一山。重戴至谷口。遵山視重戴。高僅及社首。方知衆高積。拔勢乃得陡。山坳環數郡。元氣蒸澤藪。中虛蘊靈寶。萬古誰敢剖。天閭雖已逼。地軸亦孔厚。七十二代君。貞符藏北斗。山形非徒高。遠莫測所屆。滄溟三萬里。石脈透海外。當其勢奔騰。顯越齊魯界。低瞻饒岳瀆。並此析支派。巍巍兼蕩蕩。克配天體大。其標難正視。萬象恍光怪。支峯皆整肅。略不涉奇態。風遞滄海濤。山前作清籟。三更望茲峯。月出石腹內。雲容方欲展。雷雨已在背。明明神所宅。乃復遶陰晦。冰柱十丈長。驚看石厓戴。居然神斧落。厓半亦奔潰。回飈搜激電。雪月光迸碎。遂令登陟客。倏忽迷向背。清遊雖暫阻。未敢遽思退。

終當攜松明。絕壁掃蕪穢。

雪霽

日昨大冰雪。地寒天宇陰。今晨已晴和。冰雪在我心。在地或可消。在心終不忘。庶幾炎暑時。胸次餘清涼。

二鼓抵鄭州。故城宿南關。居人時向女墻耕。一片東風百艸生。忽地樓臺空裏現。三更月上鄭州城。

重抵蘆溝橋。有懷亡弟

橋下層冰積。雪寒春明重。到感無端。白鬚老吏當車立。猶是欵欵說故官。

跋金文學學蓮悼亡詩冊後

春花紅。美人結屋花當中。秋艸碧。美人悽然立花側。花花艸艸無一年。含淚永訣梅枝前。梅枝陰陰滿天雪。豈止燕歸雛亦失。巢空難居。隻燕欲回。一日百匝。飛鳴徘徊。燕行思雛復思偶。況值主人亡未久。明朝雪霽花欲開。忍覩新燕巢中來。

蘆溝折柳圖送金文學至大梁

東西南北人。皆向長安走。蘆溝橋上往復來。便折橋頭一枝柳。蘆溝橋柳年年禿。折盡柔條剩枯木。幽燕客罷客大梁。楊柳作絮飛何忙。莫作道旁枝。莫作道旁客。道旁枝。手易折。道旁客。頭易白。

萍梗篇爲友人作

不作天上星。乃爲地下萍。星宿有定位。萍梗流無停。一風吹從西。一風吹從東。萍面作艸綠。萍背疑花紅。紅旣不如花。綠亦不若艸。我送浮萍歸。頗思故鄉好。

哭任軍門承恩

槐里朱雲本最狂。藉公時復語通方。同遊愛詠新題句。分道爲收舊奏章。子去歲大考後。卽以弟喪乞假歸。都下盛傳予疏競相傳寫。聞

事相思奠一觴。

法源寺看花卽送言八朝標至夔州任

卷施一谷中。花好無不有。主人緣獨慳。花發出門走。黃沙撲面三千里。待得看花已春尾。花前旣少雙鴉。花下更有誰提壺。櫓聲啞。花外斷。白日馬足塵模糊。花光何似江南好。花氣薰人亦難倒。君不見。看花偏值別花辰。走馬從戎趁好春。會看白帝城頭立。卻笑黃金臺下人。

春盡日夢入卷施谷看花

窗前十餘株。窺牖復窺街。高低拂牀榻。紅紫疊壓夢。幽人眠正熟。壓夢識春重。伊誰伴清寐。新燕昨巢棟。波光猛飛越。春半已消凍。緣階栽綠竹。一碧欲無縫。奇書堆面面。正此酌春甕。一晌魂已飛。南鄰笛三弄。

題左大令輔葛嶺蒿廬圖

北江至西湖。五百里而遠。一歲上冢忙。春分及秋晚。十年遠宦嗟何及。丙舍蒿先沒階級。魚殮麥飯遠莫將。反使孤兒抱圖泣。孤山葛嶺西南開。我昨詣君先冢來。摩挲松柏一回首。拜石爲洗青莓苔。虔心豈獨私吾友。雅聆南陵政聲久。君不見孤兒尙思親。欲親傳不朽。豐碑百尺亦何有。不若好官碑在口。

四月二日法祭酒式善邀同人至極樂寺小憩分韻得月字

我前遊莫釐。正值早春月。濤聲猶在耳。迫促詣京闕。凡花幾開謝。月祇兩圓缺。船頭經花朝。馬背閱佳節。我病何敢辭。我勞誰可述。風沙眯人目。紅紫色不別。雷車時聒耳。塵土鼻仍窒。蝸廬甫能定。春去已飄忽。花開思走避。俗恐砭肌骨。偶得學士棧。邀我敍契闊。賓朋集三五。飯能強之出。前遊雖隔歲。門徑亦粗別。桃李七八叢。紛披倚禪窟。縱談當世事。喜罷或嗚噎。側聞秦隴蜀。兵苦不得歇。至尊憂黎元。御殿每日晨。時時思讜論。何異飢與渴。開誠布條教。欲使黎庶活。柰何諸大吏。敷告尙不實。民猶困科斂。吏不奉法律。文書巧相抵。百變難致詰。居然貪欺成。不復畏斧鑕。兩湖全陝地。事變可臚列。因循及弛廢。百事待剛決。倒懸誠已久。水火救宜切。我官非諫諍。詎敢肆筆舌。幸多同志友。肝膽素鬱勃。能言固堪貴。尤在通治術。敷陳政之要。置彼事纖屑。雖爭焚諫艸。道路有傳說。吾儕究多幸。貯見盪平日。花前時時來。一醉百憂豁。送同年祝兵備曾至陝西軍營卽題其山寺讀書卷子

男兒少日貧如此。四面亂山如破紙。仍無一屋可蓋頭。暫借僧房作棲止。僧房似竇排山麓。夜半雲奇欲穿屋。林空無人竄驚鹿。山鬼依微伴宵讀。扇門不出眼界空。意見不與時雷同。丈夫豈肯忘世事。四海九域環胸中。一朝山雲破空去。人亦公然得奇遇。山深幸喜住十年。不爾何來濟時具。君不見。殷深源。房次律。畢竟讀書無本末。君今上馬能殺賊。下馬檄書成頃刻。亦知平生饒素識。召對尤蒙賜顏色。散關峩峩去天尺。一賊不除歸不得。露布期君在朝夕。濟時已了倘欲還。仍作山中讀書客。

偶成二十首

我聞荀生言。善惡皆有性。忍于殺人者。乃反惜物命。此非性之真。轉展惑報應。仍緣薄滋味。可自託清淨。百僞寡一真。吾心湛明鏡。

我昨謁達官。先有後堂客。思陳天下事。四坐皆簡默。移牀前復卻。日影去階尺。寧惟言不省。反欲斥狂惑。

朔風吹橫門。檐瓦響歷歷。中有揮塵人。豐貂饒菜色。近時士大夫蔬食者十有六七。

廣場三十頃。乃在池以南。近移居西華門外南池關帝廟。自非土偶居。卽作木佛菴。土功何煌煌。香火積一龕。日與神鬼

居。禍福念不參。陰陽縱回翔。柰性所不諳。攤書梵篋旁。相與同沉酣。

一身雖不費。事有大于此。何因腎與哲。僅自計生死。端居勤學道。民物寧可恃。驅馬出北街。殷然念朝市。八紘誠已廣。所見乃尺咫。欲貢出位言。愁呼妄男子。

千金構亭臺。百金施繪采。天公矜物力。不使成遽毀。前門方逮訊。後戶已遷賄。複壁不匿人。惟應穴金在。主人雖已易。朱戶仍不改。春半燕子來。啁啾舊時壘。

男兒不出門。出門路四岐。對面卽太行。途危不逶迤。裹糧思長征。白日忽已西。揮汗走不停。百里或庶幾。我寧遭豺狼。不逐狐與狸。

承平百餘載。風俗漸喜誇。物力苦不多。踵事而增華。我頃讀風詩。頗願刪木瓜。苞苴之所興。禮節日以奢。君子慎厥初。百事除萌芽。

遊魚性喜沉。林鳥性喜浮。人生居其中。渺不克自由。迴飈吹飛蓬。旋轉何日休。自非金石性。皆逐流波流。東海雖已廣。何能積沉憂。庶幾三神山。可與逸客遊。

人生一世間。駒隙影易度。飲食與衣服。詎云皆細故。所惜士大夫。視同經世務。不然營土木。樓閣極回互。平生名好客。惟見揖樓護。落落張伯松。望門先卻步。

束髮事結交。相知本難得。馳驅三十載。已寡素心客。稍能知大義。半死刀劍側。精魂歸大漠。時向夢中識。昨得插羽書。憂仍在西北。沉酣非我志。藉以遣晨夕。

縛茅作一亭。正面微向東。四壁盡斥除。依傍庶一空。侵晨卽披衣。陡覺曙色紅。社日旣已過。徧野饒春農。攬編省芸鉏。勤苦理則同。倦憩亭北隅。引領眺澤宮。他時開八窗。藉以通八風。

師臣者三王。友臣者五伯。逮茲秦漢後。視下比廝役。長孺前正論。天子輒變色。惜哉公孫宏。其性本便辟。庸儒司國柄。何事足裨益。田蚡暨衛霍。半又起外戚。當日嚴憚人。庶幾惟汲直。寒暑飲食中。所獲本微恙。忌醫兼諱疾。自恃一身壯。天時日乘除。精采忽不王。陰寒入筋絡。危至莫名狀。遂令皮毛疾。惡乃攻府臟。和緩失色啼。庸醫又何況。孔明相巴蜀。貴在飭綱紀。斷獄斬幼常。時時面流涕。古來真將軍。親愛法不廢。所以百萬師。常若身使臂。桓桓司馬法。無事出奇計。恩多不能勸。用法乃始勵。莊賈後卽誅。庶乎知此意。依艸而附木。自信不如此。平生戒受恩。盍自賢者始。伊余少迍邐。本不盼榮仕。遭逢況逾格。業已被驅使。兼之凜慈訓。詎敢背尺咫。吹律暖不回。其人已心死。平生何所慕。所慕在同調。三川恣沿洄。五岳寄歌嘯。青雲忽緣履。白日斜壓帽。側聞唐太尉。勳業繼周召。功雖積山阜。事往何足道。只惜平泉莊。生時不重到。疾風走空谷。奔此霆與雷。鬱鬱松杉姿。高榦罔不摧。一朝營華居。悼歎無良材。良材本無多。大匠意不回。我欲從唐虞。先借臯與夔。開誠而布公。一世識所歸。君看參天枝。夫豈旦夕栽。操持本不優。又欲守成例。遂令一世才。受制幾胥吏。危疑偶相值。苦乏經遠計。盈庭皆雷同。誰肯獨立異。雷同心始愜。獨立遭所忌。根矩兀傲人。英英動心氣。

鷹隼善搏物。尙懼鳳鳥嘖。豺狼欲噬人。道恐逢麒麟。今乃知不然。麟鳳性益馴。積骸雖如山。委以不見聞。轉于水火中。救此至不仁。或云西方法。祇乞見在身。羣生究何辜。冤痛杳莫伸。少年頗耽奇。氣欲吞名山。有時驅樓船。入海不願還。倏忽三十年。塵土冒鬢顏。顯晦亦偶然。山水興未闌。著書高于身。準待同志刪。要皆真氣存。足訂懦與頑。興至欲舉盃。天風響禪關。

送陳太守熙藩至貴州卽寄馮侍郎光熊吳兵備超暨程太守國瓚諸人

五年我已別南雲。又向金門見此君。幾許故人皆抗節。謂彭廷棟花連布兩軍門無多健吏亦從軍。張太守鳳枝近以事發新驢工

愁吳質官先罷。垂老馮唐力尙勤。珍重雪厓亭畔月。好封書札慰離羣。

爲法祭酒式善題漢晉人畫象

東國奇男子。重瞳是故人。偶然敬一足。天上動星辰。

右嚴子陵

百千儔類中。乞食亦一等。我欲拜督郵。琴心先不肯。

右陶淵明

書事

憶昨倉皇際。防生肘腋憂。何嘗動聲色。先已決機謀。訊鞫歸藩邸。傳呼出殿頭。縞冠纔幾日。褫服作壘囚。

斂怨知何似。茫茫八極中。干戈兆秦楚。珠玉罄南東。逼迫歸邪教。搜求過正供。明明祖宗法。百計壞淳風。全家俱內侍。甥舅暨婚姻。推轂歸予季。分符引所親。病仍升鼎鼐。敗亦繪麒麟。日晚塵如織。高門接要津。尺五城南第。經時締構崇。閣摹元武闕。人出上陽宮。金屋參天半。銅山穴地中。是誰搜複壁。珍蓄頓教空。漢廷誰巧宦。賣友得呈身。不是懷中奏。難成坐上賓。商量最高秩。汲引幾私人。附傳他時好。崔倪倘後塵。怙寵真逾昔。辜恩遽若斯。小車穿殿過。隻騎繞廊馳。地密誰能舉。天高倘未知。盛奴益無忌。通籍上軒墀。屈指承恩盼。南頭一侍郎。祇緣新歲近。催送侍姬忙。粉墨乖清議。銀黃奪舊章。浪傳收騎過。失足墮匡牀。火城三十步。煙燄欲薰天。故相揮門外。真王拜轎前。幾人容接膝。同列敢隨肩。一事尤奇絕。曾豪願執鞭。金字書恩地。由來在賜塵。憑人說鷄狗。堅自乞貂蟬。詞筆慙三榜。圖書冠一船。直廬清切處。莫謂少流傳。誰說台司重。真憐骨相輕。上公偏下視。直級亦斜行。偶舉遺忘事。時矜聰察名。猶應勝齊虜。五鼎食非烹。單車催上道。特敕不隨人。奏艸除元惡。爰書比叛臣。脅從先股栗。判吏乍眉伸。畢竟能行詐。題篇炫鬼神。賜盡圓扉日。無聊舉百觴。攀龍知已後。牽犬歎偏長。西市鳴鉦急。東原啓土忙。恨無朱椽在。親葬董雲陽。爲法祭酒題移竹圖。

一竹綠一窗。十竹綠一牖。尋常百竿竹。能使雲水皺。雖然竹性北不宜。榦葉縱具清蔥稀。先生愛竹識竹性。先引活水周培畦。豈惟竹下流泉迸。竹裏白雲圍半頃。穿廊扞牖響不停。嫩綠都浮碧天影。廣文先生

首着盤。京俸苦薄無餘餐。長飢婢僕尙林立。一一瘦若青琅玕。先生暇日繙僮約。婢未裹頭奴赤腳。擔土汲泉前復卻。一亭誅茅泉一勺。亭外更須營略約。一堵一兒顏戍削。喚取筵前侍杯酌。君不見。何時新筍出一林。我欲載酒來相尋。

哭管侍御世銘

半生每自誇龍尾。晚節憎人說鳳毛。獨有上書心事在。不教風節並錢曹。

聞先生客秋欲上封事屬艸已定遽卒莊刺史所尙及見之錢

曹爲錢南園曹劍亭兩侍御

哭董太守思駒

玉杯珠柱書難著。鳳髓龍筋判獨傳。記得白雲溪水漲。凌晨送上溯江船。

君回里中匝月由浙江水程赴潯州任到官甫七日而謝世

自勵

寧作不才木。不願爲桔槔。桔槔亦何辜。頽仰隨汝曹。杈枒適當時。旋轉如風濤。高原多低枝。感汝汲引勞。一朝時雨行。棄置眠蓬蒿。

寧作無知禽。不願爲反舌。衆鳥皆啁啾。反舌聲不出。豈繫果無聲。無乃事容悅。依依檐宇下。飲啄安且吉。何忍視蜀鵲。啼完口流血。

涼夜

艸蟲忽無聲。人倦鳴亦倦。疎螢夜不飛。悄立蒲葵扇。
長廊不燒燈。夜久佇殘月。秋風驀地來。十二簾齊揭。
三更涼意多。蒲葉響回波。斜界龍樓影。游魚不敢過。
暑氣夜不收。移牀入林隙。帳頂明一星。森森知大白。

牧牛詞

門前黃牛老。牧兒甫襁褓。兒年四五卽飼牛。牛轉惜兒年過小。六七歲甫交。兒肩及牛腰。昨年上書兒八歲。兒足居然跨牛背。飼牛已了仍牧牛。牛知兒心喜出遊。登隴涉水無時休。半年送兒入村塾。半歲書從牛背讀。兒思阿耶牛憶犢。卻鼓長鞭入牛屋。牛背下來書爛熟。

種魚詞

祖遺十頃田。乃在城門邊。低窪不堪耕。卻引河水流濺濺。一船淤泥兩船重。肥土出魚何必種。南邊菰蒲北菱葑。更灑浮萍作魚俸。波面旣養鴨。波底復種螺。昨宵一雨通北河。隊鴨更挈成羣鵝。小時魚苗怕鴨鳴。魚大竟同鵝鴨狎。掉尾時時欲相壓。賣魚歲入得萬錢。不羨鄰舍耕原田。君不見原田遭荒無六穀。豈若魚池歲常熟。

畜鴿詞

老翁誅茅作一堂。東西南北皆鴿房。老翁無妻有女郎。引鴿入室還穿廊。朝來糴得新舂稻。鴿剩方令女郎飽。鴿欲出房先卻掃。老翁呼鴿皆以名。好在一一能承迎。翁倦鴿亦眠無聲。休嫌養鴿形神敝。與鴿居能助精氣。閒上翁衣立翁臂。君不見。老翁龍鍾女遠適。死仗鴿羣爲弔客。

養蠶詞

飼牛須小兒。飼蠶須小女。小女纔上頭。靈明已如許。堂中一筐復一筐。屋左屋右皆柔桑。挑桑作蠶衲。桑作蠶褥。蠶食蠶衣無不足。閒來習靜深閨裏。一種心情更堪喜。與蠶同眠復同起。蠶行作繭女嫁夫。裁繭作女身上襦。君不見。養蠶雖勞得蠶效。拜得馬頭孃上轎。

寄石太守韞玉

聞說東川守。騎驢過百城。書仍寄旁午。地未塞夷庚。啓事人先悚。君以川匪曲折作啓事致成親王王卽以上聞登壇衆盡驚。巴渝兵火地。何以慰疲氓。

雨歇

高下窗櫺竹柏生。南池雨歇近三更。夜涼殘月清無寐。聽到秋蟲第一聲。

卽事

攜尊訪幽客。三至不一遇。門前秋樹好。樹下石堪據。涼風西南來。竟爾挈衾具。近刪詩不作。頗復減思慮。

惟于人事外。時得少佳趣。白鳥笑客狂。翩翩入林去。
朝陽出偏遲。昨夜路仍溼。車行三里外。已有暗香襲。幽人邀客住。一屋大如笠。平鋪波萬頃。高下見塔級。
居然空色相。顧視尙難入。萬朵白藕花。鷺絲何處立。

讀書倦後偶題齋壁

蕭齋賃三間。長日渺何事。因無用世心。益堅傳世志。行裝本無幾。并疊陳篋笥。所居幸深遠。熱客無一至。
中年驚已過。盍扣囊底智。不見七十翁。辭官課奇字。時正寄書錢少詹大昕索所著聲類

遣興

千杯百杯皆已空。昨者醉夢殊怔忡。承天之高豈一柱。受地之命惟孤松。孤松流青柏流翠。冷眼看人百
年內。當前何事尙營營。入後有人思潰潰。
堅持一念皆可傳。瓦硯木榻驚齊穿。丈夫自信不役物。方寸以內嘗湛然。性靈自足供抒寫。美醜都看入
陶冶。三千里外賦歸與。十九年來忘兀者。

後遊仙詩

地在中天見可真。半從高處望紅塵。冥濛似蟻還如豆。都是三千世界人。
誰打泠泠澗底鐘。月明人宿第三峯。朱符夜半催行雨。臥聽天龍喚地龍。

詔集周秦漢宋儒。寓言曲筆勅刪除。修成三十三天史。一字都無梵釋書。
月午濤聲響怒雷。滄溟盡處覺扉開。誰憐天外花如海。只我騎鯨一再來。
雨雨風風春事休。誰言上界總無愁。可憐清淺銀塘水。不穀天孫日飲牛。
碧虛景色太蒼蒼。日月從無背面光。乞取火珠三百顆。凌晨先與挂明堂。
爾許遊蹤向客誇。偶隨漢使泛星槎。九天九地行都徧。輸與仙人萼綠華。
作賦何須定馬枚。偶揆淹滯出塵埃。詞人下第文人老。流落都歸天上來。
天田近亦種桑麻。略遣仙人識歲華。偷住碧虛三十載。日紅從不到窗紗。
可是東皇意見殊。上方日日有遷除。神仙自恐無才思。偷讀人間未見書。
清虛一別事茫然。消息誰從下界傳。聞說白榆天上樹。夜涼時亦噪秋蟬。
呼吸疑通下界潮。天孫機畔水迢迢。月中仙桂如堪斫。先與栽成獨木橋。
不用爐峯向上薰。四邊香氣自氤氳。生來著色屏風好。檢取嵩高岱頂雲。
神仙多半是中年。白髮從無挂兩肩。更與種桃園裏異。天街行徧少廚煙。
天河迢遞隔天關。露氣雲光日往還。不放雙魚住天上。怕傳消息到塵寰。
踏得星光顆顆青。撥雲時坐白沙汀。天街一事偏惆悵。可惜從無疎雨聽。

獨構茅齋靜見聞。年來四氣總難分。偶扃北牖開南牖。已覺漫天盡火雲。
百年一瞬夢何曾。超劫先居嶽上層。飛下九天三萬里。卻驚足底日華升。
欲踏雲梯第一層。生驚石礎潤難登。冥濛下界三旬雨。引得靈河氣上蒸。
雲生雲滅望初窮。知隔黃塵幾萬重。獨占一天誰與共。兩三蝙蝠數株松。
閒來多是坐忘時。不讀丹經不賦詩。怪底東南雲似墨。書仙半日偶臨池。
昨宵騎鶴下蓉城。一舉千杯醉未成。蒼狗白衣都不管。隨他足底亂雲生。
要從天上捉迷藏。銀漢紅墻界畫方。粗服亂頭編一隊。董雙成與杜蘭香。
誅茅都在白雲巔。學道心清自不眠。抽得地坪三四尺。倒呼明月到床前。
白楊種不到天門。自詡飛仙萬劫存。要向天公破陳例。凌虛高築醉人墳。
雲林一到一徘徊。選勝頻同逸客來。構得山亭要奇古。剝殘星斗種莓苔。
天邊甲子記依稀。宵半晴光已四飛。齊向玉虛稱賀朔。曉霞紅作上朝衣。
北出雲門磴數盤。天風時一凭闌干。因看太白峯頭雪。始識稜稜下界寒。
東南一抹是揚州。天外山排十二樓。欲趁新涼看滄海。月高吹笛下雲頭。
偶得東皇食料單。烹龍炁鳳亦全刪。清虛自有餐霞法。東海靈芝進一山。

玉軸牙籤散不收。偶逢閒日亦勾留。名心畢竟銷難盡。檢得奇書作枕頭。
疎星三兩逗河津。新月如船欲載人。便擬裁帆向東去。麻姑傳說海揚塵。
行童一輩隨徐福。避世千年住武陵。華嶽峯頭毛女笑。一般鄉里各飛升。
白鶴峯頭到偶遲。三生一笑本難支。何妨背面仍分手。萬歲千秋見有時。
天然顏色勝吳娃。住近西池阿母家。養得靈蠶大如虎。也應喫盡佛桑花。
偷將暇日闌華筵。一輩誰如張老顛。只自愛看塵世界。倒騎驢子上青天。
玉皇香案住多時。慧業偏教上界知。惹得洞天三十六。都來乞我作新詩。
雲腳微黃雨腳青。望中日腳復瓏玲。前頭去海無多路。且借天腰作暫停。
七夕偶題寄女紡孫

匝月都居水上頭。夜涼雲向竹間流。輸他百鳥啼春徧。一箇吟蟲欲占秋。
層層暝色上閒廳。簾底繙書手暫停。買得一瓜如斗大。豆花棚底祀雙星。
花氣衝廊竹塞門。全家應復坐雲根。閑將故事從頭說。壓倒符孫與胙孫。
佳辰偏要耐心腸。曝過奇書曝畫忙。第一莫將花染指。預防紅色汗青箱。

宗崔月令手全鈔。誰似吾家幼女嬌。莫證瓜期是初六。怕他烏鵲再填橋。

江南人皆以初六夜爲七夕。

神魚曲

大魚立水長一丈。昂頭看船不相讓。船撐欲近魚忽飛。白浪溼盡卅人衣。抽帆追魚魚不及。夜夢大魚波外立。明朝風浪急護持。咫尺看我成龍時。

神狐曲

狐強神弱爭一屋。狐悍操兵穴神腹。神逃荆棘不敢言。白晝狐枕神龜眠。藝神訴天狐始悔。爲神不終願爲鬼。君不見重新社屋迎故神。畢竟狐尙居承塵。

有饋蟹者戲答

萬羊太尉唐代。萬鴨詞林本朝。若許各從所好。願烹十萬霞螯。

偶成

眼冷心空日。長安始易居。三更池閣上。眠對白芙渠。